

四庫全書

集部

欽定四庫全書

華陽集卷二十五

宋 張綱 撰

經筵詩講義

關關雎鳩在河之洲窈窕淑女君子好逑

臣以為此言淑女之德宜為君子之配也雎鳩之為物其性則摯而有別其聲則關關而和有別而不失其和淑女之況也水中可居曰洲而河又水之險者在河之洲則去人遠矣淑女者窈窕之況也窈窕者

幽閒深遠之謂也。速匹也。淑女雖在窈窕而其德乃可以為君子之好匹。此后妃所以樂得也。說詩者以大序首言關雎，后妃之德，故以雎鳩為后妃之况。臣以文義考之，當况淑女而不當况后妃也。蓋所謂關雎，后妃之德者，關雎一篇之詩，乃后妃之德耳。亦猶鵲巢夫人之德，而詩乃以鵲巢比國君，其所以為夫人之德者，亦鵲巢一篇之詩而已。舉鵲巢以證關雎，則關雎為淑女之况，義固曉然矣。

參差荇菜左右流之窈窕淑女寤寐求之求之不得寤寐思服悠哉悠哉輾轉反側

臣以謂詩人欲述后妃求淑女之事故于首章先言淑女有宜配君子之德然後序后妃所以求之之意夫澗溪沼沚之毛可薦於鬼神則荇菜者供祭祀之物也后妃之求淑女在於協心以供祭祀故以荇菜言之流求也其意若曰荇菜之生參差而不一求之者當左右而無方譬猶淑女之在下窈窕而難見求

之者亦當寤寐而不已然后妃之心猶以為未也求而不得則寤寐而至於思服悠者思之長也輾轉反側者卧而不周也思服而至於輾轉反側不能安寢則其求之可謂至矣於此有以見后妃憂在進賢出於至誠有不能自己者

參差荇菜左右采之窈窕淑女琴瑟友之參差荇菜左右采之窈窕淑女鐘鼓樂之

臣以謂此二章言后妃至誠待淑女之心有加而無

已也。筆之為言擇也。求而後采，采而後擇者，俱待采之序也。寤寐求之，然後琴瑟友之，鐘鼓樂之者，待淑女之序也。琴瑟常御之樂也，故鹿鳴燕羣臣，則曰鼓瑟鼓琴，鐘鼓至大之樂也，故彤弓饗諸侯，則曰鐘鼓既設，此蓋燕禮小而饗禮大所用之樂，亦從以異。今后妃之待淑女，始則欲以常御之樂友之，而通其交際之心，終則欲以至大之樂樂之，而極其歡欣之意。此所謂至誠有加而無已也。且天子之於人材，不患

其不能尊顯於朝廷之上而常患其遺逸於下是以先王之治於丘園巖谷之士尤加意焉然則闕雖之求淑女每章必以窈窕為言者可見后妃進賢之志首及於疎遠矣此所以能輔佐文王而協成周家之治也

葛覃后妃之本也后妃在父母家則志在于女功之事恭儉節用服澣濯之衣尊敬師傅則可以歸安父母化天下以婦道也

臣聞禮曰甘受和白受采忠信之人可以學禮蓋言  
其有本也文王之化刑于寡妻而后妃所以能成關  
雎之德者則以葛覃之本有以受其化也蓋后妃之  
賢出于天性方其在父母家志則在于女功之事惟  
其志在女功之事則知夫身所被服者勤勞而不易  
得故能恭儉節用服澣濯之衣也夫履后妃之位則  
勢既尊矣恭儉節用服澣濯之衣則德既成矣然猶  
尊敬師傅而不敢忽則躬行於閨門者豈復有過舉



之累哉此其所以能歸安父母也如上所陳而卒至  
於歸安父母此其所以能化天下以婦道也孟子曰  
孰不為事事親事之本也孰不為守守身守之本也  
葛覃之詩事親守身之道備矣故序詩者以為后妃  
之本

葛之覃兮施于中谷維葉萋萋黃鳥于飛集于灌木其  
鳴喈喈葛之覃兮施于中谷維葉莫莫是刈是獲為紵  
為絺服之無斁

臣以謂此二章言后妃女功之志也葛所以為締綌  
女功之末者志在于葛則絲枲可知矣葛之覃兮施  
于中谷維葉萋萋則葛方茂盛未成之時也葛之覃  
兮施于中谷維葉莫莫則葛已成就可采之時也后  
妃之於女功志焉而不敢忘故往來于中谷以觀葛  
之漸長而采之方其初往也葛茂盛而未成但見黃  
鳥飛鳴于灌木之上顏色之美聲音之好有可以悅  
其耳目及其繼往也葛成就而可采矣於此無暇及

于耳目之所聞見唯知刈葛而獲之以為締絡專心  
致志服之而無厭斃焉雖然后妃大邦之子也豈其  
實然哉詩人賦其意而已

言告師氏言告言歸薄汙我私薄澣我衣害澣害否歸  
寧父母

臣以謂此一章言后妃既嫁而歸寧父母也后妃之  
勢可謂尊矣及其歸寧必先告于師氏此叙所謂尊  
敬師傅汙煩擗之也澣濯之也汙其燕居之服而澣

其事宗廟舅姑之夜在常人不足道唯后妃服之則可謂恭儉之盛德然其汙也澣也固非好潔其衣服薄而已矣非止於薄而已也又擇其何所當澣何所當否然則后妃修飾其身如此而歸于父母之家父母之心有不寧者哉斯干之卒章祝其女子無貽罹于父母觀后妃之歸寧然後知其父母免於憂也卷耳后妃之志也又當輔佐君子求賢審官知臣下之勤勞內有進賢之志而無險詖私謁之心朝夕思念至

于憂勤也

臣竊觀葛覃之序言后妃在父母家則志在于女功之事此則后妃之本志也及其作合于周而供內助之職則不特女功之事而已又當輔佐君子求賢審官是以有卷耳之詩蓋人君之治無大于求賢審官者誠能求賢以任使之審焉而勿忽則衆職並舉天下不足為矣故后妃既求淑女以協成內治而于輔佐君子又必以求賢審官為先也文王之時羣臣戮

力以趨事后妃知其勤勞是以欲燕勞之而進其賢者則非有險詖私謁之心也然求賢審官文王之政后妃唯當輔佐之而不敢與其事焉有其志而不敢與其事是以朝夕思念至于憂勤而不釋序詩者以為后妃之志又當如此故以其詩次於闕雎葛覃之後也

采采卷耳不盈頃筐嗟我懷人寘彼周行

臣聞卷耳易得之菜也頃筐易盈之器也夫采易得

之菜以實易盈之器又采采而不已然且不能頓盈  
况賢才之士為難得百官之位為至衆欲求難得之  
材以實至衆之位可不思念之乎此后妃所以有懷  
賢人之德而欲寘之周行也

陟彼崔嵬我馬虺隤我姑酌彼金罍維以不永懷陟彼  
高岡我馬玄黃我姑酌彼兕觥維以不永傷陟彼砠矣  
我馬瘠矣我僕痡矣云何吁矣

臣聞崔嵬山之險也虺隤馬之病也臣下之從征役

者陟山之險乘馬之病可謂勤勞矣后妃欲酌金壘  
之酒以勞之庶慰其永懷之心也山脊之岡則其險  
甚于崔嵬玄馬變黃則其病甚于虺隤山甚險而馬  
甚病則勞之宜加厚故欲酌罰爵以樂之樂之以罰  
爵則非止金壘而已蓋人有甚勞則其心必至於永  
傷尤當有以慰之也若夫山極險而謂之砥馬極病  
而謂之瘠不特馬病而僕且病則臣下之勤勞至矣  
如此乃不言酌酒以勞之但吁嗟而已何哉蓋酒食



者后妃之事也爵賞者朝廷之政也臣下之勤勞彌至則報之在乎爵賞而酒食有不足用焉然朝廷之政后妃所不敢與聞此其所以吁嗟而已也

樛木后妃逮下也言能逮下而無嫉妬之心焉

南有樛木葛藟纍之樂只君子福履綏之南有樛木葛藟縈之樂只君子福履將之南有樛木葛藟縈之樂只君子福履成之

臣聞后妃正位宮闈同體天王顧夫人嬪婦之屬貴

賤之勢固有間矣惟貴賤之勢有間故每以逮下為  
難小星言惠及下而曰夫人無妬忌之行膠木言逮  
下而曰無嫉妬之心然則逮下之事唯無妬忌者能  
之耳木上竦曰喬下曲曰樛喬則與物絕故曰南有  
喬木不可休息樛則與物接故曰南有樛木葛藟纒  
之葛藟在下之物也以木之樛故得附麗以上喻嬪  
婦之屬所處在下以后妃有逮下之德故亦得進御  
於其君若是者上恩達于下下情通于上閨門之內

不失其和矣文王之治始于憂勤終於逸樂后妃逮下而閨門以和則內治成矣文王安得而不樂哉惟樂其內治之成所以能安享福祿故曰樂只君子福履綏之臣嘗觀易之設卦剛柔相雜而變生故或吉或凶相為倚伏唯謙之為體自卦繇象象以至六文之辭無一言及于凶咎悔吝以是知謙之為德所以致和于天下無往而不利既無凶咎悔吝則福隨之矣夫逮下而無嫉妬之心謙德也以是而和其閨門


則其君子免于凶咎悔吝而安享福祿也宜矣葛藟  
繫之則附麗以上而已荒之則又言其奄覆之也繫  
之則不止于奄覆又旋繞之矣福履綏之不若將之之  
大將之不若成之之備詩人美其事有加而無已故  
其言之序如此也且天保之序言君能下下以成其  
政而一篇之詩備述福祿之事然則文王之治外固  
已下下而致福祿矣以此見樛木之逮下乃所以化  
文王之德而輔佐之也

螽斯后妃子孫衆多也言若螽斯不妬忌則子孫衆多也  
螽斯羽詵詵兮宜爾子孫振振兮螽斯羽薨薨兮宜  
爾子孫繩繩兮螽斯羽揖揖兮宜爾子孫蟄蟄兮

臣聞螽斯蚣蝑也鄭康成云凡物有陰陽情慾者無  
不妬忌唯蚣蝑不耳然則螽斯於萬物中獨有不妬  
忌之性且生子之多故詩人取以為況後之說詩者  
謂螽斯微物性或難知是以于此序不能無疑臣竊  
嘗深求之蓋上古穴居野處日與鳥獸相親故能畢

知萬物之性三代去古未遠學者皆有師承研窮物  
理尚皆精審故其所言有後世不能及者且七月詩  
言斯螽動股莎雞振羽以至歷紀在野在宇在戶之  
候月令言螳螂生腐草化以至獺祭魚豺祭獸鳩拂  
羽虎始交皆非後人所嘗見而知者然載在典籍垂  
信萬世由是觀之螽斯之不好忌詩人必有以知其  
性矣固無足疑也說說生之多也薨薨飛之多也揖  
揖聚之多也振振言其性厚繩繩言其戒慎蟄蟄言

其和集子孫衆多而不賢則適足為患故又及其賢  
德也



華陽集卷二十五

欽定四庫全書

集部

華陽集卷

二十六至  
三十二

詳校官庶吉士臣瑚圖禮

主事臣呂雲棟覆勘

總校官編修臣王燕緒

校對官主事臣陳文樞

謄錄監生臣宋學濂



欽定四庫全書

華陽集卷二十六

宋 張綱 撰

啟

賀朱中書啟

伏審光膺中詔峻陟西臺以端方直亮之偉人當佐佑  
詢謀之大任士夫相慶遠近所同竊以朝廷之官莫尊  
于二府政事所本獨繫之中書禮固重於前聞任莫難  
於今日邦基再造王業中興邊陲之兵革未寧州郡之

盜賊多有六飛在御靡遑奠枕之安二聖蒙塵方佇迎  
鑿之策法度尚須于訂議人材尤急于搜揚息四民愁  
嘆之聲還萬里農桑之業惟茲數十難能之事悉委二  
三同德之臣非有真賢曷當盛舉恭惟某官建標天地  
逸足風雲眇萬物以遐觀曠千齡而獨步粵從早歲固  
已優夔契之才雖在平時常不廢廊廟之語遭國家之  
多難作屏翰以宣勞嘗險阻於兵戎出沒之中罄忠嘉  
於上下危疑之際身任大計心懷隱憂時方急於播告

之修職遂當乎詞章之選思如泉涌吏胥以脫腕為辭  
令若風行父老至扶杖往聽此特其筆墨之游戲蓋本  
於議論之淵源擢自北門進登左轄眷中樞之虛位疇  
僉言於外朝不藉多人思見元超之治無易卿者果歸  
廷碩之賢夫位盛者憂必深而望隆者功亦大既參華  
於宰路實同秉於國鈞撥亂興衰頗類斷鼉而立極修  
廢舉陞必將解瑟而更張庶觀君子之所為當與天下  
而同慶某賦性庸陋與世闊疎忝竊一官推移半世申

屠幸而無過蓋由托庇于賢人鮑叔知其有親遂復攝  
官于卿部正閒居而待次忽虛宁之登賢情發於中喜  
深不寐念此洪鈞之託益知孤迹之安元禮龍門固莫  
陪于賀客公會鳳沼願長借于恩波

賀白太宰啟

某官先朝元老後學宗師忠嘉夙簡於上心密勿久陪  
於國論廟堂倚以為重縉紳賴之而安三星耀天極之  
旁自然拱北九鼎藏神策之妙正合調元非天私于有

邦惟帝賚此良弼職當補袞既高山甫之賢門不受私  
况得申屠之譽欽承渙號允協師言夫移風非俗吏所  
能而正臣乃治世之表必將道揚洪烈弼亮中書豈惟  
專八柄以詔王是乃兼三公而論道夫曹參非不治事  
蓋安下民者清靜為先如房喬專任進賢則執大政者細  
微可略兼濟二美獨高一時他人所難唯公是賴

首尾闕

賀黃相啟

伏審光膺制綽峻陟台躔一代偉人允協股肱之望八

荒壽域悉歸陶冶之公歡聲所加和氣可召竊以春秋  
尊上公而謂之宰人主論宰相而付之權一日萬幾經  
大猷於有截參天兩地幹洪造以無私雖曰衆賢聚于  
本朝必也上帝賚之良弼始協雲龍之會可圖竹帛之  
勲果得真儒克勝大任恭惟某官逢時多難許國一心  
早奉王靈遯分帥閫謀謨制勝臨尊俎以折衝社稷  
危督干戈而周衛高塞觸紛以赴光武房喬杖策而謁  
太宗感會有初忠嘉彌著離亨作於明兩扶日轂以升

賜晉錫蕃于晝三冠天樞而入輔獨當宥密深贊經綸  
載疇柱石之英亟委鈞衡之寄國勢增重乎九鼎民瞻  
益峻乎三階夫位盛者憂必深而望隆者功亦大考申  
甫以烝民高高之什事特著於蕃宣稽魏丙以元康地  
節之功時靡聞於變故記在舊史尚稱名臣今乃遭古  
人之所未嘗任朝廷之所最重凡是規恢之略得於笑  
談之間蓋將洗萬古而空之豈特專一時之盛者某銜  
袖雖漫於襦刺曳裾阻造於膺門聞盛舉之軒昂激懦

衰而奮勵

賀呂相啟

關





--	--	--	--	--	--	--	--

賀劉相年啟

歲元啟祚建夏正以求端邦憲始和謹周官而垂治恭  
惟某官安危注意文武兼資列上相于東垣頽面太微  
之位撫成師於南服獨登大將之壇號令風行首渠電  
掃壯萬里長城之勢寬九重旰食之憂茂對休辰倍膺  
殊祉牙旗日暖知細柳之春回黼座天臨佇公槐之晝  
接庶諧啟沃用福寰區某待次鄉閭坐忘歲律竊依仁  
於封域願屬禮於鞶橐賀燕爭趨適阻負薪之疾登龍

莫遂徒傾恭梓之心頌詠所歸敷宣曷既

代姪合謝解啟

一郡應書孰非勅敵十條問義獨冠羣儒雖不足致之意中亦自喜出于望外竊以六經之要百世所傳粹然道德之微盡在是矣炳若帝王之制孰能違之故自虞夏商周以來莫非詩書禮樂之教習聞其號豈獨見于修身被飾厥文蓋將用以取士奈何報以一說使之拘於小文黨同門而妬道真是末師而非往古大道既破

更令益繁乃不能漸進民心復何以激昂士氣每發德音下明詔固以為將新復古之科而進直賢舉實廉乃反不能明當世之務此漢唐所同患者非睿智莫能革之幸真主之篤生喜斯文之復振四海咸仰萬化更新方一德以同風學弛專門之禁俄兩忘而化道人無異戶之趨師心自得于淵源揮翰曷嫌于忌諱文風蕩蕩士論洋洋乃復見三代之英是謂極一時之盛宜取國士以最能書如某者智之周身才不逮衆粗學古人之

事靡諳世俗之心韓子文工送五窮而不去相如志在  
空四壁以徒慙雖見笑於新學晚生固未嘗不潛心大  
業然膏油以繼晷有類書癡因筆墨以成文頗或技癢  
頃自成童之歲固已挾策而遊較數子有一日之長欲  
百戰取萬全之勝鄉評與善泮水呈能曾叨一鶚之薦  
書遂冠六鰲而稱首觀光上國方欣從下土而來合戰  
春闈不謂見大敵則怯既折北而不就敢圖南而再飛  
屬茲更化之初競奮仰高之志毛錐鐵硯念頑姿尚足

以磨新白蒂黃茅故荒學益加于鉅舊適侯邦之詔下  
偕鄉士以朋來筆陳爭先文鋒競逐遣趙使而少一初  
笑遂以備員舉漢士之無雙不圖錯乃充賦出乎其類  
得之若驚雖漆鑑之無私亦品題之過分青檀舊物去  
七年而復還綠綺新聲鼓再行而愈麗念言么麼誰使  
遭逢此蓋伏遇某官性稟嶽靈才高人傑華國富文章  
之譽立朝聞議論之公左史記言合春秋之大法西清  
賜對敷寔諤之深忠偶厭直于承明暫出分子于方面吏

畏神明之政民歌愷悌之風大度包荒念不遺於一物  
至誠推轂尤樂取於羣材致此謬庸亦蒙甄錄某敢不  
勉葺舊學益勵前修化蟲臂之微幸已成形於造物搖  
羊角而上誓將奮翼于天池庶獲微勞仰酬大惠

代姪合上葉左丞啟

潘宣重寄有嚴制閭之雄草芥微官獲造曳裾之列念  
五窮之見困叨一眄以增榮仰佩謙光伏深愧汗竊惟  
自古寒士之或顛躓必擇當世巨公以為依歸非獨慕



於風聲殆將希其題拂羸糧裹飯願見者忘重趼之勞  
擁箒掃門託迹者有終身之幸望光塵于坐客之末承  
咳唾于立談之間升濟堙沈奮發枯朽是以一識韓荆  
州之面封侯至或可輕粗知蕭潁士之文僕廝戀而不  
去必將收拾四方奔走之士宜有超絕一時卓偉之才  
而况道德高于古人勲名冠于當代激昂恩義慰薦孤  
貧倘有哭於途窮可無望於川納恭惟某官累朝舊德  
間世英姿溫溫秉君子之文挺挺有大臣之節詞章灑

靈陋班馬以稱工廊廟經綸贊臯夔而並駕功存社稷  
名在鼎彝東山方逸於謝安南土已思於申伯繡裳虛  
宁將疏三接之恩齋鉞選賢先拜十連之寵威行外鎮  
令肅中權寬九重宵旰之憂協千載風雲之會輕裘緩  
帶投壺雅歌泛水依蓮遶集幕中之彥披雲捲霧共談  
堂上之奇會謂謏聞敢期殊遇方懼旅進而旅退遽蒙  
三浴而三薰惟大賢無所不容與其潔也故君子信于  
知已輒盡布之伏念某家貧無以代耕晚歲乃知向學

然膏油而繼晷羞篆刻以成文謬忝一官虛甑待瓜時  
之及坐間三載束裝赴桐汭之期不圖豪奪以成風遂  
致孤蹤之失路望窮閭而却走追故步以懷慙越人鬻  
弓談笑者衆孺子入井怵惕為誰與其抱隻影以興哀  
孰若仰宗工而自訴竭來彌月老去驚春幸造膺門猥  
竊登龍之譽載懷襴刺尚希薦鶚之書退念餘生亦云  
易與苟得効一職而受侏儒之俸便能食衆指而安鷓  
鷃之枝桃李成陰諒春工之可待粃糠猶鑄納鈞造以

何難誓捐未死之軀庶答不貲之惠

代舅李治表上宰相啟

掃門願見幸承咳唾之餘拜命言旋息出陶鎔之末初  
官過望舉族增輝念修遠於台墀恍已更於歲籥王春  
布令道迎和氣之回賢業熙天允集神休之盛恭惟某  
官夙韜遠略起佐中興道格皇天功高邃古金聲玉振  
師孔孟以遭時武緯文經輔堯湯而致治自再登於宰  
路乃獨秉於元鈞事有至難非衆人之敢決謀皆素定

仗大信以必行收兵柄以強主威息羣言而定國是遠  
馳使節大浹鄰歡豈徒盡人之事而人有革心殆將合  
天之意而天亦悔禍固陵肇卜果獲奉於龍輔長樂久  
虛迄迎還於駟馭上以寬宵旰劬勞之念下以慰黔黎  
慕望之私盛德所傳曠古未有某逢時不競晚學何知  
依仁桑梓之鄉忝迹門闈之舊惟大業未忘于遺履故  
危蹤竊效于彈冠燕頷何人敢有封侯之志鼠肝微物  
徒勤造物之私自視空疎無所論報永言瞻詠但極精

微

又代賀冬啟

惟天地四時之氣胚胎已肇於黃鍾布神明萬物之和  
變理實資於公鼎恭惟某官道傳孔孟德並臯夔坐幹  
鴻樞丕闡彌文之化中興寶祚獨高蓋世之勲四民阜  
康五物來備日官居卿以底日順剛長于時亨天子郊  
祀以配天贊乾行於熙事神人交相視履多祥隆國棟  
以益尊固邦基而同永某官叨寵借跡因孤微萃五福

以朋來但想槐庭之慶列羣英而熙賀莫陪衮席之趨  
江東提刑到任謝宰相啓

蕭然衰病之餘何心祿仕付以澄清之任有覲面顏矧  
一路之所臨合十州而共治民力已凋於近歲吏奸多  
忽於下情盜竊起而縱橫兵戈隨以紛擾誰非聽訟蔑  
聞行露之歌責在有司宜慎觀風之舉有如頑鈍曷稱  
選掄得官十有九年遇事百無一可索長安之米嘗獲  
誚於卽潛昧城旦之書顧奚堪於使指徒以親庭之欲

便遂叨鄉部之初除有同擇地而安實出自天之幸瓜  
期屢及匏繫彌深每將攬轡以之官輒復杜門而待次  
閱歲陽之七換更宸綽之四頒舊物故存政恐妨於近  
制新恩甚渥俄就易於鄰封夫以山野陋庸之姿上煩  
朝廷委曲之記使其自處未必能然冒寵則優撫躬曷  
措茲蓋伏遇某官躬秉道德端居廟堂扶社稷之中興  
頗類斷鼇而立極正紀綱之欲壞尤先推轂于羣材致  
此賤微亦蒙甄錄

上呂都督啟改云某官入冠揆路出  
總戎旃天下有達尊三異數兼榮于



將相中國之長技五神兵坐鎮于蠻夷大開公正之途  
不棄草茅之賤致茲孱瑣亦預使令某敢不恪奉教條  
講修職業念乘軺之非據深懷顛覆之憂仰大厦之可依實  
賴旃幪之賜其如率職不敢愛身

上葉左丞啟

矜庶戮之不辜誤玷軺車之寵長萬夫而觀政竊竊依帥  
閫之嚴自視庸虛可量欣幸恭惟某官華夷重望廟社  
元勳文高三代之英德冠累朝之舊入參大政訏謨恪  
奉於中宸出殿雄藩宵旰靡勞於北顧民瞻益峻帝賚

彌勤行歌自鎬之歸式副為霖之望某謬將使指獲踐  
封圻披雲霧于青天即遂趨風之拜假旃幪于厦屋庶  
無零雨之虞

華陽集卷二十六

欽定四庫全書

華陽集卷二十七

宋 張綱 撰

啓

與馬運使啓

折獄致刑欲革放紛之弊奉指銜命猥叨欽恤之司自  
惟非材竊幸餘茫茫恭惟某官德名重於國器文譽藹乎  
時髦簡在宸衷屈臨漕計積紅腐於九歲已高流馬之  
功奉紫泥之十行佇復富民之拜不圖朽質獲近英標

冀辱獎提粗逃官曠決鼠牙之滯訟念方愧於平反附  
驢尾以追途尚或希於致遠

與陳運使啟

衰病餘生顧何堪於祿仕澄清重寄竊自懼於顛躓恭  
惟某官問學得之淵源才猷敏于經濟欲試幾微之務  
暫淹飛輓之勞底慎邦財已見錢流於地上趣歸禁路  
佇觀詔下於日邊曾是陳人獲聯治部鼠牙決訟深慚  
行露之歌鵬翼搏扶願假垂天之蔭

回趙提點啟

卧病鄉閭莫遂挂冠之請按行獄市徒增攬轡之羞尚  
幸庸虛仰依明哲恭惟某官受天間氣為國老成蘭省  
潛郎藹聲華於士論蓬山僊伯獨領袖於英遊惟其多  
開務成物之材故欲展富國強兵之術鍾官咸奮寶藏  
滋興佇聞驛詔之頒歸踐鴛行之寵豈伊朽質獲近餘  
光登元禮之門念進趨之匪遠倒陳尊之牘辱褒借以  
彌勤適方在行不即裁報

回宣州張守啟

衰病餘生杜門已久澄清重寄攬轡奚堪欲稍緩於曠  
瘵幸密依於明哲伏惟某官學窺聖域名右漢庭直指  
遺風吏識乘輅之舊剖符新政人推卧閣之賢遠圖暫  
屈於州麾異寵即歸於禁路顧茲頑鈍夙仰聲猷邈爾  
治封未講郵書之好藹然譙德先貽袞字之褒欽佩過  
情重慚不敏

回建昌朱守啟

登孟博之車量材曷稱倒陳遵之牘荷意惟勤適將命  
以在行愧占詞之弗謹某官風雲逸足霄漢垂光龍馬  
負圖聯內閣邃嚴之直鹿車方道廣侯邦惠養之仁念  
久處於蓬山宜即歸於禁路豈伊晚節獲覩餘光疇昔  
論交尚紀緒言之益撫謙下逮猥先翰墨之頒足未及  
於踵門心已傾於望履

與池州葉守啟

伏審光奉明綸寵臨巨鎮妙簡西清之列整分北顧之

憂下車云初闔境相慶恭惟某官道貫三代學通九流  
履更藩翰之勤綽有神明之政矧池陽之名郡當江左  
之上游兵火仍灾痛創殘之未備閭閻復業仰慈惠之  
方深行聞卧閣之功遂促征車之召某稟性甚拙慕德  
惟深將命在途漸喜封圻之近造門有日即諧雲霧之  
披

回太平許守啟

伏審光膺宸綍懋建州麾仰師帥之得賢措兵民於無



事歡呼所至遠邇惟均伏惟某官忠嘉夙簡于上心才  
術更優于時論藩垣借重拯黔黎於塗炭之餘樽俎折  
衝驅盜賊於笑談之末雖下車之日未久而閉閣之風  
已高將促召於鋒車遂進儀於禁路顧茲庸陋竊服聲  
猷銜命于行尚阻膺門之謁鳴謙下逮猥先蕭贖之頒  
拜賜則優感銘曷既

與饒州李守啟

負薪嬰疾將待盡於餘年攬轡之官遽叨榮於一路自

視衰遲之迹尚依明哲之光恭惟某官抱王佐之偉材  
明國家之本體進儀禁路專史臣言動之書出偃侯藩  
著循吏撫綏之政閱時未久雅望益隆豈容卧閣之堅  
行趣追鋒之召敢圖晚節獲並英游奉指不才莫決鼠  
牙之訟危蹤有託徒欣驥尾之榮

回董提刑啟

鄉閭待次聊欲奉雙親之歡獄市平反何以當一路之  
寄未卜交符之日已深攬轡之羞正賴故人曲垂大庇

伏惟某官天麟表瑞廟璉稱珍蔚高國士之風早勵古  
人之志螭坳直筆已推孤史之家聲共閣細書更仰蓬  
山之舊業稍淹大用良鬱師言佇促鋒車復還禁路自  
顧衰遲之迹夙叨朋舊之私邈未造于高閔猥辱先于  
華問瑰詞借譽敢忘置袖之三年良晤有期尚冀解顏  
而一笑

賀權樞密啓

伏審光奉明綸進登右府允協股肱之望獨當宥密之

司無間邇遐同增忭喜竊以國體所繫兵柄為先峻極西庭上應斗樞之象贊襄密命入籌帷幄之嚴事有關于中書尊實等於丞相欲廟堂之增重顧選授之尤難方將委任而責成並注安危之意有能奮庸而熙載宜兼文武之資恭惟某官受天傑材為國重器學海造域中之大孔孟同歸談鋒多堂上之竒孫吳暗合早飛騰于華近遂罄竭于忠嘉矧當四方負固之時尤賴千里折衝之策果膺殊渥遂贊本兵玉帳經綸既奠安於宗社

槐庭密勿即正位於公台仰觀君子之所為期與天下  
而同慶某稟生疎拙夙荷眷知聞新命之初傳覺歡悰  
之倍集心同燕雀徒忻廣廈之成身繫匏瓜莫遂趨庭  
之謁其如頌詠曷究敷陳

賀參政啟

伏審光奉明綸入叅大政事闕廟社喜格天人竊以治  
道所先擇賢為大置諸廊廟必求名德之全若時謀謨  
用協股肱之望矧國家之多難方宵旰以深憂將期解

甲而息肩尤在折衝而制勝故隨會見用晉國之盜逃  
奔而汲黯在朝淮南之謀寢息公議既與羣陰自消爰  
有哲人克膺明命恭惟某官金聲玉振武緯文經議論  
醇乎古人備四時之正氣典章出其大手炳三代以同  
風起自祠庭復還視草坐席未溫于東閣機衡遂贊于  
中台衆賢聚於本朝已覺巖瞻之峻上帝賚之良弼行  
叶鼎鉉之尊某晚學何知承顏最舊念去桃陰之久幸  
依松里之仁新命初傳歡悰倍集按行獄市方親駟突

之躡瞻望鈞擢坐阻鳧趨之謁其如欣訟曷究叙言

賀內翰啟

伏審光奉明綸還直北門之峻親承密旨獨居東閣之尊驚詔令之一新仰恩榮之如舊歡呼相慶中外所同竊以翰墨文章擅詞林之寵詢謀獻納專內相之權是為儒選之極高殆非他材之可雜玉堂晝靜鈴索夜呼備黼座之天臨紛書詔之雲委任官能否係國重輕實惟選授之難況任艱虞之日憂邊思職將推頗收于禁

中求舊得人豈歎嚴徐之見晚恭惟某官曠世之高材  
獨步立朝之大節可觀以忠信結於深知彼功名視為  
餘事仰斯文之未墜賴故老之重來蓮燭夜歸墨麻曉  
出山東悍卒行聞感泣之恩坐上同寮佇興禮絕之拜  
某稟生疎拙夙荷眷知聳新命之初傳覺歡悰之倍集

賀建康李端明啟

伏審升華秘殿出鎮雄藩十國為連兼總兵民之寄萬  
夫觀政坐銷愁嘆之聲無間邇遐同極忭喜恭惟某官



大事能斷遠圖是經秉直節而不回肅威名之久著立  
朝抗論奸謀既息於淮南分閫受師茂略更煩於江左  
隱若長城之勢居然奠枕之安豈徒卧護於一方蓋將  
伸威於萬里顧茲庸陋叨荷眷知獄市按行未卜交符  
之日台擢趨進預欣望履之榮倘宿惠之未忘尚孤蹤  
之有託

朱相遠迎啟

伏審光奉明綸寵還真館促赴鋒車之召有嚴袞路之

趨久屬望於蒼生佇儀圖於舊德入當國論宜大臣無  
憚於暑行妙簡淵衷諒宣室已傾於前席觸炎威之方  
熾涉砥道以惟勤聳聞旌馭之來首獲望塵之拜其為  
欣幸固罄敷陳

上呂都督啟

伏審仗鉞臨戎益峻三台之望前茅啟道有嚴十乘之  
行肅萬旅以營屯擁百神而呵護江山改觀廟社妥寧  
恭惟某官忠憤格於天淵勳名震乎中外任茲國事獨

以身先鷄火方中觸炎曦而罔避招搖在上考視履之  
多祥某志在執鞭職當負弩屬採薪而獲茨趨半道以  
馳還尚賒約束之嚴竊動震惶之色仰惟鈞造俯賜鑒  
憐

與韓舍人啓

阻奉英標念久更于歲籥側聞吏隱方就逸于祠庭仰  
高靜退之風重積瞻馳之素恭惟某官才雄當代名配  
古人進登侍從之華獨藹詞章之譽承明厭直閔勞既

遂於高情宣室召還圖任將歸於大用顧茲頑鈍夙荷  
眷知論五經於石渠尚記緒言之益按九章於獄市敢  
忘厚德之依適整駕以在行喜望塵之不遠倘未絕曳  
裾之禮期遂造于門牆猶或崇伐木之仁願復承于馨  
欵歡悰所激占叙奚殫

與姚都運啟

竦服聲猷志極高山之仰叨承庇映寵增末路之光馳  
驅尚阻于登龍寤寐敢忘于附驥恭惟某官名高月旦

識洞陽秋問學深游夏之科才術妙管蕭之亞有嚴戎  
閭聯上相之賓寮獨任計臺萃六師而飛輓威行八路  
風動一時民不告勞士有宿飽策殊勲于異日孰先經  
畫之勤拜新渥以還朝佇副弼諧之望時當流火涼生  
穉金聞旌旆之少休諒神人之咸喜起居甚適福履且  
宜不勝拳拳門牆之私聊供區區竿牘之問

與傅參謀啟

走塵路之七旬敢有懷安之志望牙旗于千里浸稽伏

謁之儀非自置於闕疎諒必蒙於簡照恭惟某官才雄  
當代名配古人富五經之紛綸為四海之模楷奮志英  
特濟時艱危尊相臣以兼將臣首冠賓寮之選使仁者  
以佐賢者獨高籌策之良沈深方贊於中權叅決遂專  
於帥閫威行八路風動一時坐分北顧之憂遠却南侵  
之侮戮鯨鯢以築京觀期國難之將平作舟楫而濟巨  
川竚祖風之復振顧茲么麼雅辱眷知一去門牆七更  
歲籥心傾三益敢論杵臼之交職在九章正賴旃幪之

庇即奉承於約束已志切於馳驅

與劉叅議啟

逖遠聲猷每極高山之仰頻更冠亂靡遑尺牘之修退  
念闊疎伏增震懼恭惟某官瑞麟一角祥鳳九苞學窮  
游夏之淵源文列傅班之伯仲姓字早標於千佛名敢  
直言忠嘉屢罄於七人事無遺策志欲康於天步時方  
迫於戎昭泛淥水而依紅蓮沈靜已煩於遠略涉赤墀  
而登紫禁便蕃行服於邇聯惟是謬庸夙承盼睐幸因

賤事當稟令于轅門已涉修途即通名于賓謁

與韓太尉啟

伏審南服宣威破梟羣而雷掃北轅奏凱肅虎士以雲  
屯諒先十乘之行自致百神之護恭惟某官智深韜略  
神授機符當國步之多艱奮戎昭而特起漢壇獨拜家  
聲既嗣于淮陰衛幕遐征師律益嚴于灞上肆平巨猾  
果奏敷功亟振旅以還軍佇策勲而進律某平反獄市  
景仰轅門竦行旆之匪遙顧趨風之敢後即期瞻望預



極忻愉

賀孟參政啓

伏審光奉制書肇臨督府機衡舊德載聯上衮之華貌  
虎新軍更須中權之令歡欣畏愛遠邇均齊恭惟某官  
溫溫秉君子之文挺挺有大臣之節深憂國計自結主  
知廊廟登賢早入陪於大政甌閩謀帥亟掃蕩於兗渠  
顧茲八路之權尤屬九重之慮欲成丕烈宜付偉人畀  
冊命以加榮更節旄而增重居然奠枕隱若長城恢漢

祚于中原佇復孔明之策扶唐室而再造徐觀尚父之功某身在洪鈞職當部屬望光塵之入境風堅負弩之誠受約束以趨風將遂執鞭之志

與詔使啟

伏審光膺宸詔榮奉使華問俗觀風按六條而黜陟登車攬轡聳百郡之觀瞻恭惟某官天賦遠猷世承恩命公才公望早膺負宸之知允武允文遂贊樞庭之議肆求直指果副僉諧導德意于問閭兵火之餘達幽枉于

宵旰焦勞之際威行漢節仍兼御史之權名配周官大  
振揮人之職矧褰帷特專於所任而授指固異於常時  
暴勝之高逐捕之名徒繡衣之有耀范孟博抗澄清之  
志曾給札之無聞孰若當仁斯為盛舉某衰遲末路景  
仰英標叨承犴獄之司平反何有忽報輜軒之使投劾  
靡遑倘使青天獲雲霧之披尚覲厦屋有旃幪之賜

華陽集卷二十七

欽定四庫全書

華陽集卷二十八

宋 張綱 撰

啓

賀朱相啓

伏審誕膺渙號進位台司巖石彌崇復見儀型之舊廟  
堂增重載圖弼亮之勲善類有歸斯文大振竊以興邦  
之要論相為先冠羣后而輔一人非宿德重望不足以  
副倚毗之任撫四夷以安百姓非深智遠略不足以盡

康濟之宜矧當兵火瘡痍之未瘳欲繼紀綱壞亂之遺緒顧茲體大尤見才難申甫相周宣王有復古之美寇鄧佐漢光武致中興之功要在任得其人不然何以能國恭惟某官建標天地論篤古今盛德粹溫氣備四時之正雄文雅健風同三代之醇早依日月之光亟濟雲龍之會遭時不競秉國之鈞翊萬乘以兵戎出沒之中屹長城而外距撫羣情于兗孽搶攘之際溯大川而獨航遂正君臣再安社稷方閔勞於機務旋屬望於蒼生

趨赴鋒車還服衮職上既悔用於新進偉舊德之登庸  
人皆喜見於老成跂同心而輔政儀圖大計恢復中原  
佇觀賢者之所為將與天下而同慶某賦性甚陋辱知  
最深邀聞新命之傳倍激歡悰之切

賀信州連顯謨啟

伏審光奉除書遠臨巨屏一麾出守暫分宵旰之憂千  
里承風已服神明之政恭惟某官才不世出道與時行  
養之有源學問窮於壺奧發而中節功業蓋其緒餘粵

從清切之班屢屈藩宣之寄遇盤根而必解恢游刃而  
有餘矧茲上饒寔古名郡徒得君重載煩卧閣之能既  
結主知即赴追鋒之召如某謏陋夙荷眷存回想石渠  
恍英游之若夢聳瞻熊軾覺良晤之有期懼忤之懷叙  
言曷究

回宣州沈待制啟

上同前  
至之寄矧宣城之故郡多謝公之遺民獄訟不繁笑談  
可辨雙谿疊嶂想未厭於登臨一札十行諒即膺於重



任如某謏陋夙荷眷存發策宸庭既識鷗鵬之化觀風  
獄市更聞襦袴之謠念良覲之尚賒辱華牋之先及謙  
冲則至感佩何言

與交代張提刑啟

伏審寵拜宸恩榮持使節將有光於前政用深憂於得  
人恭惟某官問學得之淵源才猷稟乎精粹論思古人  
之事力行憂國之言含香握蘭謂即升於華近登車攬  
轡猶暫屈於澄清簡自淵衷惠茲江左兼六條而並舉

聳一路之遐觀滯訟將平反而出之巨奸有投劾而去者眷言孱陋夙仰聲華未修望履之勤遽有交符之契簸糠揚粃不自意於居前藏玷匿瑕尚卒叨于餘蔭嚴冬屆候行李在途緬惟跋履之勞默有神明之佑

除左司謝宰相啟

仰止三台方極掃門之願貌茲一介遽叨推轂之勤顧何幸以能當凜不知其所措嘗謂治道莫難於今日圖功宜急於任賢故凡朝廷之官皆為擢用至於宰相之屬

尤號要司贊紀綱出納之權茂省闈彌綸之望名雖列  
于左右事咸總于劇繁異時臺閣華資間由此出有若  
廟堂餘論亦或與聞惟遴東於名流乃克堪於器使顧  
如某者將焉用之材無博敏之稱學有迂愚之誚仕中  
都者八任自揣何功更靖康之初元始從外補歲月漫  
淹於待次馳驅靡効於平反正合投閒敢期妄進上方  
考慎其相端欲收委任之功命曰惟暨乃僚庶幾獲同  
心之助殊不自意辱此誤恩茲蓋伏遇某官夙高衛社

之忠懋贊經邦之業載專揆路益峻民瞻支大厦於將  
傾獨任棟隆之吉秉洪鈞而密運坐施太宰之平恥一  
事之或失其宜收羣材而各致其用肆時掾佐採及庸  
虛詳整自持固無及古人之事勤勞可効誓將酬國士  
之知

復待制謝宰執啟

罪如山積方置散于窮鄉思自天回遽叨榮於邇列撫  
躬何以得此承命不知所云伏念某學不造乎古人性

難諧於世俗頃從疎遠誤辱明揚幸得陪兩省論議之餘  
亟欲報千載神明之遇笑王孫之失問肯懷媚竈之私  
多謝息之能官獨信挈瓶之守煩言可畏素志莫移

張相

自之過字下改云雖知進未能知退每懷據疾之憂然  
守道不如守官姑盡挈瓶之智慮無一得技已五窮忽

聞云

速聞禍發於駭機始覺身危於累卵屈從薄責仰

荷洪仁懲沸吹蠶一飯敢忘於往咎看山拄頰終身已  
分於長閒不謂孤蹤驟蒙渥澤釋其罪罟寵以恩綸多  
病早衰竊隆名以畢桑榆之景雙親益老資厚祿以奉

救水之歡獲幸為多歸誠有自此蓋伏遇某官奮庸上

宰允迪大猷

二參云望高人傑躬秉國鈞

絕朋邪以開衆正之門拯

陷溺而與自新之路謂觀過各於其黨或公論之可申

顧于人無所不容豈一青而遂廢有如疵賤亦與甄收

謹當欽佩訓詞恪守名節參西清之鴛鷺已容叨昧於

明時挂神武之衣冠尚覲矜從於它日情之所感言不

能文

通朱相啟

逖違鼎席四序修其將周屏伏衡門尺書曠而弗嗣坐  
念濶踈之迹曷勝慙懼之心仰恃洪私尚垂簡點恭惟  
某官學窮今古道貫天人蚤膺巖夢之求遂陟台符之  
峻挺夷險之一節更勤勞之百為子儀再造唐家名高  
而朝不忌叔敖三相楚國功大而身愈卑自遭閔艱亟  
解機務方奪情於優詔俄力請以終喪隙馬如馳慨祥  
琴之既御鋒車促駕趨召節以非遙即覲宸庭還登揆  
路瞻儀刑於舊德大恢復乎新疆庶寬宵旰之憂式副

黔黎之望某夙承眷獎預切傾依徂暑屆時尚炎威之未解明神來相諒素履之多祥願益保綏下符虔祝

賀趙相冬啟

黃鍾應律肇基四氣之和紫極當陽共賀一人之慶維時上宰與國比昌恭惟某官偉德望以端明輔聖神之休運載安社稷全濟黔黎天地為鑪獨秉甄陶之化河山作誓蔚高帶礪之勳茲茂對於初陽宜倍膺於多福益隆國棟永贊皇圖某謬忝官聯過叨獎予瞻言衮席



曾莫預於進趨跼伏衡門但彌勤於祝頌

丁父憂服闋上宰相啟

門牆掃迹一終俄紀於周星里社偷生尺素莫通於記  
室非仰恃於高明之照敢自踈於舊賤之知惟是傾瞻  
不忘寤寐恭惟某官載登鼎席獨運廟堂同德一心具  
著弼諧之效參天兩地丕昭寅亮之功維巖益具於民  
瞻隆棟遂強於國體以內則境土復版圖之舊靡煩一  
鏃之施以外則敵國交玉帛之歡行迓兩宮之返惟茲

盛事從古罕聞中興之期可坐而策眷乃衰殘之迹曷  
勝誦詠之私哀制甫終顧無階于望履商飈方厲願益  
保于冲襟

服闋上執政啟

逝遠台席不知歲月之流屏伏衡茅莫貢寒溫之問念  
夙承於眷遇敢自置於闕疎宏度所臨愚衷必鑒恭惟  
某官名垂宇宙義薄雲天素韜廊廟之姿出際休明之  
運臯夔並駕精神足以折衝揚馬同時文章蓋其餘事

自入參於大政乃益礪於公忠用宏經世之規坐翊丕天之績皇威克振版圖俄復于齊疆外患潛消宗社再安于周鼎惟茲盛事

云云  
同前

### 賀鎮江孟郡王到任啟

伏審光膺制詔出殿翰藩下車云初闔境相慶恭惟某官懋昭令德允迪大猷孤忠久簡於上心重寄獨當於方面江山改觀草木知名大纛高牙方迓鎮臨之寵耕田鑿井已銷愁歎之聲自念餘生夙欽高義顧養痾于

閭里未遂披瞻惟竊芘於旃幪實增欣幸

賀張樞密冬啟

律應黃鍾肇一陽之獨復氣調玉燭先四序以均和履  
德之基順時以正恭惟某官當朝宿望濟世元勳茂迎  
剛長之晨坐享朋來之福全師保勝折衝將靖於邊陲  
舍爵策勲爰立佇歸于廊廟顧如孱瑣夙荷眷知命數  
多艱適有負薪之疾筋骸難強莫遑細柳之趨瞻望門  
牆第深祝頌

賀朱相冬啟

羲畫分文陽應地雷之復周正建子法垂象魏之和品  
彙時亨賢哲道長恭惟某官功存廟社名在鼎彝坐迎  
日至之辰順履朋來之福仰梁公於北斗獨推耆德之  
高起謝傅于東山大慰蒼生之望惟茲朽鈍夙荷眷知  
千里瞻言短羽莫陪於燕厦八年遠迹舊陰徒想於桃

溪

乞再任宮祠上宰相啟

屏處兵樊仰鈞衡之在望寢更歲籥曠竿牘而弗修唯  
有傾瞻不忘寤寐恭惟某官位尊上衮德冠三階立社  
稷之殊勲自生民以來而未有修祖宗之故事雖百世  
不易而可知公道方行斯文不墜山甫中興於周室子  
儀再造於唐家蔚高不世之名允屬當朝之傑眷言孱  
瑣忝迹簪紳雜草無功心甚慙於犬馬負薪有疾齒遽  
迫於桑榆方貪竊食之安再有奉祠之請所期終惠以  
苟餘生兀若朽株顧難勝於風雨渠然厦屋願永託於

幘幘

賀鎮江汪內翰到任啟

伏審錫命中宸更符巨鎮旌騎方聞於壓境閭閻已浹  
於歡聲某官德配古人名重當世獻納早膺於皇眷文  
章獨掞於天庭粵從親近之班屢出藩宣之寄雙溪疊  
嶂固未厭於登臨一札十行俄復頒於寵渥以鐵瓮江  
山之勝付玉堂詞翰之宗風醇而獄訟不繁事至而笑  
談可辨汲長孺之治民清靜信卧閣而有餘黃潁川之

下詔稱揚諒追鋒之不晚顧茲朽鈍久辱眷知占籍治  
封正賴旃幪之庇杜門卧疾尚稽桑梓之恭緬想光儀  
但增欣忭

賀鎮江蔣龍圖到任啟

伏審十行奉詔閔煩飛輓之勞一水揚舡就屈藩宣之  
寄歡聲載路和氣回春某官學富家傳才優世用早踐  
更於中外獨藹著於聲華木牛流馬之功方仰資於國  
計皂蓋朱轡之寵俄易畀於藩條佇見褒嘉亟躋禁近



顧如末契幸竊餘庠尚稽恭梓之儀敢後馳牋之敬

賀鎮江鄭侍郎到任啟

伏審一札十行詔趣甘泉之舊雙旌五馬寵臨方面之  
雄下車云初闔境相慶某官高文華國厚德鎮浮早聯  
親近之班備罄忠嘉之節均勞既久屬望彌崇上方思  
見賈生將召還于宣室民固未忘汲黯聊借重於淮揚  
仰瞻師帥之賢已服神明之政眷言末契久闊英游少  
須當力於病衰尚冀復承於謦欬

賀鄭侍郎年啟

單闕肇歲正四序以履端象魏布和率萬民而觀治化  
工有俶賢路方亨某官名簡上心望高方面載肅藩條  
之舊茂迎寶曆之新皂蓋行春已布宣於德意鋒車就  
日將入侍於皇明顧此病衰莫遑展慶光塵在望祝頌  
彌深

丁母憂服闋上宰相啟

憂居苦次固知歲月之徂竦仰槐庭莫貢寒溫之問念

夙叨於甄治敢自棄於濶疎內省孤衷伏深大懼恭惟  
某官位冠羣后名震四夷咸有一德以格天得伊尹自  
任之重思兼三王而施事致周公旁作之勤時旣得矣  
而身愈恭愛莫助之而功益懋整乾坤於兵革捨攘之  
際奉虞舜以解憂還風俗於祖宗全盛之時大周宣之  
復古凜凜帝王之佐煌煌社稷之勲遠稽厥初獨立無  
二然且謙虛而下逮不緣疎賤以遐遺凡具識知悉同  
依仰某分窮命薄福過灾生銜恤去官痛難勝於哀慕

變除終制恩實賴於矜存尚念餘生欲襄大事顧無財  
不可為悅舍干祿莫知所安自躍不祥倘鑪錘之未棄  
雖悲勿洎庶窳窳之有終輒陳悃悞之私妄有祠宮之  
請退量僭率冀獲哀憐

賀黃侍郎年啟

厯占堯象出日方賓歲啟夏時建寅為正恭惟某官蔚  
高雅望臨寵巨藩政修鼎取之新序協泰來之吉明神  
攸介福履具宜皂蓋行春方布和於闔境紫泥封詔遂

趣駕於追鋒顧此病衰莫遑展叙

賀鎮江張朝儀到任啟

久闊英標阻奉尺書之問忽聞新命下臨方面之雄豈  
惟慶師帥之得賢亦以慰朋游之素望王瞻懷甚邇歡忭  
可量某官學造古人文推作者趨時適變而才無滯用  
奉法遵職而治有能名肆膺廊廟之知特畀藩維之寄  
眷此南徐之地實分北顧之憂江山勝絕而民醇粗賦  
樂輸而政簡既卜時而視印果來暮以騰謠似聞將促

於追鋒正恐不容於暖席某居然尸祿老矣就閒緬惟  
森戟之嚴曾是布衣之舊每念青編之共學獨憐華髮  
之墮顛不自意于衰頹復有依仁之幸倘未忘于雅素  
當修請謁之儀庶卜暇時略談故事惟涼秋之屆候諒  
福履之具宜願益保綏副茲虔祝

回鄭侍郎賀年啓

璇璣占象仰七政之回天寶歷頒時慶三元之肇歲仰  
止一都之會粹然九牧之賢皂蓋朱轡已肅班春之令

清都絳闕將嚴就日之趨顧馳慶之未遑忽飛牋之先  
及拜嘉有覲佩德無窮

華陽集卷二十八



欽定四庫全書

華陽集卷二十九

宋 張綱 撰

啓

賀執政冬啓

氣行無間一陽進而朋來福生有基萬寶滋而萌動惟  
時盛德與國同休恭惟某官名世鉅賢端朝碩輔奮文  
章之大手領袖諸儒竭啟沃之深忠丹青萬化協千載  
風雲之會冠百工柱石之良茂對昌時倍膺殊祉佇正

鈞衡之拜益崇廊廟之瞻不間邇遐實同忭喜某叨恩  
祠館屏迹鄉粉緬想光儀徒深頌禱

賀鎮江王尚書年啟

歲且更始與物偕昌福生有基惟人所召伏惟某官公  
才獨步時論同歸輟從親近之班來重藩維之寄長江  
流惠比屋興謠象魏之布始和坐擁春祺之慶晉康之  
錫蕃庶行膺晝接之榮顧此病衰久於庇賴仰光塵  
之在望叙桑梓以猶賒徒有頌言少伸悃悞

回鎮江請赴鄉飲啟

式序賓賢莫重習鄉之禮欲知王道必觀稽古之文眷  
此盛儀行於會府宜選期頤而有德庶參賓介以無慙  
曾是謬庸猥蒙寵連摛詞甚過揣已奚勝仰和樂而不  
流固願得陪於席末惟暮年之多病實難自強以階升  
非敢固辭尚祈照亮

回金壇請赴鄉飲啟

伏審虔奉新制舉行習鄉特枉翰箋俾陪賓位屬有眩

昏之疾難自力於進趨緬懷揖遜之儀但彌勤於瞻頌

回葛丞謝解啟

伏審棘闈較藝賈餘勇以先登鶚薦飛書超羣英而得雋凡預交親之契同增歡忭之誠馳慶未遑貽賤遽及啟牘載披於麗藻玩詞彌服於高才感佩之私敷宣固既

回宋知縣啟

伏審拜命九重字民百里竊聽輿人之誦雅知令尹之

賢某官才兼衆長望重一世官不擇地聊欲試於絃歌  
治有能名諒難淹於朞月顧茲衰朽久服芳華自憐投  
老之蹤將有依仁之幸方圖遣問忽奉飛牋披溢美之  
英詞荷高情而增愧

回葛丞謝及第啟

伏審恭承大問摘章獨掞於天庭光被殊榮唱第寵登  
於僊籍士夫相慶科舉得人某官識稟天材文傳世業  
書破萬卷窮學海之淵源筆掃千軍擢詞林之根柢方

鎖廳而應詔遂發策以決科志諧拾舊之圖恩拜維新  
之命顧如賤息久竊餘光同為蟾窟之遊猥辱謙誨退  
念鯉庭之訓有愧前修惟慶謝之未遑忽牋函之先及  
過情得譽拜賜彌慚

回張察院啟

睽違英標阻貢牋函之問忽聞中詔茂膺憲府之除士  
論僉諧朝綱允肅某官學窮千古心醉六經文章華國  
而有餘蔚高大手譽望得君而益重峻陟青雲况當日

治之朝尤難風憲之任職分六察身率百寮鷓鴣搏空  
已振霜威之厲鴛鴦接武佇躋法從之嚴遂究設施深  
符屬望某辭榮簪紱卧疾山樊知言路之有開覺歡悰  
之倍集鬱然粉粹旣分同社之榮暮矣桑榆更切餘光  
之照心所甚喜言不能文

賀陳相冬啟

召陽以律應復卦之初爻求端於天建周正而布治惟  
時碩輔與國同休恭惟某官道貫三才智包九德棟隆

廣廈納四海於幘幪坯就一陶鼓羣生於橐籥神人底  
豫夷夏輯寧茂對令辰備膺嘉貺某叨恩洪造屏迹窮  
鄉緬想槐庭阻造承顏之列恭馳竹素敢稽事貴之儀

回秀州張守啟

丘樊屏跡誤被弓招綸綍疏恩遽當銓部顧衰殘而曷  
稱徒震懼以彌增徽倖惟多黃綠有自伏惟某官德高  
時論名簡上心茂建州麾夙著勞能之效行躋禁路益  
觀設施之方特假吹噓以及庸陋曾未伸於謝悃忽先



辱於誨函謙以與人仰佩過情之譽歟然揣已奚勝流  
汗之慙

回折端明啟

伏審光奉中詔寵臨大邦政令一新士夫交慶恭惟某  
官躬蹈九德心潛六經負王佐之英才獨當妙簡委樞  
庭之重任屢罄嘉謨方自託於退閒忽起膺於重任總  
一路兵民之寄寬九重宵旰之憂坐席未溫威令先騰  
於南海追鋒已趣台躔還拱於北辰益展猷為用符屬

望某謬尸榮祿夙仰光塵貢咫尺之書尚稽郵傳荷謙  
虛之德先隆芳函感佩以還敷宣罔旣

除參政回兩府啟

叨承命綽擢與政機用過其才感深以懼方今聖王之  
在御獨奮乾剛而有為所以任承德之臣必將責事功之  
實顧如某者何以當仁念才術之空疎矧年齡之遲暮  
挂冠得謝久絕望於恩榮乘傳趨還復叨官於禁從未  
閱周歲遽陟近司懇辭莫遂於循牆危懼有同於據蒺

此蓋某官急賢人之引類明上臣之事君借以褒揚致  
茲忝冒謙詞俯逮既曲荷於推前重任難勝更願聞於  
善後

知婺州回兩府啟

病辭機政冀休養於餘生恩畀輔藩尚叨塵於煩使荷  
皇慈之曲被撫衰質以奚堪竊惟寶婺之區近接王畿  
之化溪山明秀歌八詠於先賢風俗安恬揖二僊之遺  
範將使承流於昭代必推名世之偉人有若耄昏初無

才術遭逢興運濫陪四近之聯黽勉暮年愧乏一毫之  
補已這嚴誅而竊幸敢分樂土以偷安茲蓋伏遇某官  
華嶽三峰明堂一柱貳公弘化密參宙亮之權偃兵息  
民坐贊安疆之道樂君子成人之美體聖君優老之心  
特假吹噓致茲忝冒郡條始布方圖貢於柔緘郵傳遽  
臨乃先貽於誨翰仰佩謙抑曷勝悚惶

回監司賀冬啟

氣回初律一陽進而上行道協亨時諸福備而畢至伏

惟某官才優公論名簡上心暫駕軺車增重觀風之任  
行趨召節遂通持橐之班茲允迪於昌辰宜朋來而受  
祉方期展賀遽辱惠音輒附致於柔緘用陳悃悞第感  
銘於謙德莫罄敷宣

回宣州樓樞密啟

貳政暮年初無補報分符千里誤玷寵靈揣暮齒以奚  
堪覺慚顏之有覲伏惟某官清朝先達當代老成輟經  
濟之宏才暫承宣於巨鎮雙溪疊嶂雖多暇日之娛黃

閣紫樞政復須賢之久佇膺召節歸覲凝旒某自顧叨  
逾出於庇賴王事鞅掌欲修謝而未遑君子撫謙辱貽  
賤之先及其如悚佩莫罄敷宣

回鄰郡賀年啟

王正肇序聿新布德之元君子履端丕擁自天之慶伏  
惟某官探原奧學經世宏才追三代以同風久去詞林  
之直長萬夫而觀政暫煩卧閣之賢茲坐對於春祺宜  
鼎來於韶節遂還清禁益懋遠猷某假守鄰封風霑河

潤念未遑於展賀乃先辱於貽箋佩德何窮捫心有愧  
回董直閣賀冬啟

郊迎日至天子歛福以錫民道與陽升賢者對時而膺  
祉某官才為世用仕結主知畫枕青縑早流聲於省戶  
朱幡皂蓋久借重於江城茲逢剛長之辰佇俟台還之  
命某養痾如舊賴芘尤深欣一線之添長稍延暮景望  
雙旌而阻造但祝多祥

賀鎮江楊少卿到任啟

伏審暫輟禁途聿臨會府溫言寵錫知委任之非常令  
日頒條聽歡謠之已洽伏惟某官身兼數器名動九重  
踐揚親近之班具著忠勤之績三章弼教釋之久誦於  
無寬千里擇賢長孺果聞於借重蓋欲革外輕之弊豈  
徒寬北顧之憂諒暖席之未遑趣追鋒而亟下靜惟衰  
朽夙荷照存投老鄉枌方依仁而竊幸贄名賓凡期力  
疾以猶艱輒寓牋滕少伸悃悞

賀鎮江韓尚書到任啟



伏審光奉除書寵臨會府旌麾照日開八座之儀刑條  
教回春聳萬夫之觀聽伏惟某官立朝雋望經世長才  
夙遭神聖之知具著忠嘉之績上星辰而聽履班早冠  
於甘泉集鞞袴以迎郊威旋行於南服茲甫祥琴之御  
載膺符竹之分以長江控扼之邦付三輔剗裁之手真  
成假道者即追鋒眷言投老之踪曾是同寮之舊治封  
占籍託庇賴以云初賓祀贄名困衰遲而阻遂聊陳干  
牘少達悃悃

賀趙直閣冬啟

聖人設卦驗剛長於復來君子對時協道亨於泰內某  
官鈞深敏職濟務宏才學探淵源夙著韋平之譽政先  
慈惠遠追召杜之風方順序以迎釐宜自天而錫寵眷  
言朽質幸託餘庥久濶笑談未遂賓儀之展緬懷祝頌  
敢稽慶牘之修

賀都統劉太尉到任啟

伏審光奉十行總提萬旅先聲遠暢奠國勢以彌尊嚴

令初頒肅軍容而改觀伏惟某官大忠奮發妙略沈雄  
當四郊多壘之時立萬世不刊之績破白奴而趙邊無  
犯孰先李牧之奇兵敗符堅而晉祚中興獨賴謝玄之  
決戰勲昭彞鼎名動華戎夙登大將之壇屢剖介藩之  
竹眷江淮之列戍寔輦轂之上游易畀中權載識倚毗  
之重佇宣優詔趣升宥密之嚴某久仰英猷幸依洪庇  
漁音始布共欣朝論之公衰迹深藏未遂賓儀之展聊  
陳短牘少述鄙悰

賀趙直閣年啟

漢殿受圖禮隨時正侯藩謹朔德與春回伏惟某官慶  
襲僊源學窮聖間屢屈分符之寄益恢拔薤之規占歲  
事於八風方勤勸課拜宸恩於三接佇躡清華眷此衰  
遲久于庇賴莫遂舉觴而獻祝敢忘削牘以馳誠

賀都統劉太尉年啟

順三陽而畫泰歷紀新元大一統以書王慶均列辟伏  
惟某官名垂宇宙功冠旂常暫分細柳之屯增重長城

之勢比膺宸眷既趣覲於凝旒願納春祺亟進禋於闕  
袞某棲蹤蓬巷矯首轅門阻稱椒栢之觴聊致箋滕之  
禮其如祝頌固罄敷宣

賀方敷文冬啟

先王治歷方考驗於初陽賢牧撫民已召回於和氣某  
官望高時彥德配古人久踐劇繁屢試發矧之夙行躋  
禁密益搏運海之風茲茂履于復亨宜大來于泰吉某  
心勤桑梓迹遠旌麾念君子之得時阻陪賀侶撫衰悰

而竊忤姑寓柔緘

回曹教授啟

歸老菟裘漸忘世故仰高泮水尚隔風儀敢期婚媾之  
求遂辱賤賤之貺恭惟某官文摛黼黻學探淵源惟樂  
其義而利其仁故仕既久而未嘗干進然弼諸中而彪  
諸外雖時未遇而莫掩蜚聲方英主有為之朝乃志士  
圖功之日恩華可跂閥閱增高况聞謝氏之芝蘭已造  
孔門之堂室欲諧佳耦宜得名宗猥及衰微何勝悚佩

指長途而附驥切欣盛德之可親執敝帚以掃門深懼  
弱孫之勿稱倉皇裁謝草率為慚尚冀高明曲垂鑒照  
賀鎮江李寶文到任啟

伏審拜命楓宸輟清班於卿士升華寶閣分劇任於侯  
藩師帥得人里閭交慶伏惟某官機深燭理才大濟時  
簡上帝之心方在朝而美政通常世之務更治民以考  
功眷長江扞敵之衝正萬里交馳之會擇賢而授倚重  
惟深佇觀襦袴之成謠復指鷓鴣而接武退循衰病首

託庇床未卜造門先承惠翰

賀李寶文年啟

三陽應律方順履於新元五馬行春已召回於和氣某  
官名高簡帝才大濟時聯西清邃密之班壯北固藩維  
之勢師蓋公之清靜頒條每戒於烹鮮被黃霸之稱揚  
歸覲佇看於儀鳳載臨端月益介繁禧某迹遠使旌心  
傾談塵緘詞尺素莫殫善禱之私竊陰甘棠徒極偷安  
之幸



回王運使啟

仰止英標未卜趨承之便辱先榮翰過形褒借之勤自  
揣空疎何幸愧感伏惟某官才高瑞世學奧窮源擅剖  
符持節之權著騰實蜚聲之美蟬聯緒業久傳江左之  
風流烜赫功名行冠漢庭之班列某稟生極陋投老無  
庸聞卜宅於鄉邦喜棲蹤於德宇病衰成懶已稽削牘  
之恭渴想增懷尚冀披雲之幸

華陽集卷二十九

欽定四庫全書

華陽集卷三十

宋 張綱 撰

雜文

衆會黃錄青詞

庶類貪迷凡有生不能免死千劫受報非上聖無所祈  
哀用申不忍之私仰瀆益高之聽昨自國家多難始於  
北敵內侵甲兵散以雲屯盜賊從而逢蝨起炎威所及玉  
石俱焚慘毒不勝川谷流血况饑寒癘疫之所迫害雖羽

毛鱗介亦或殘生宇宙之間禍灾若此諒彼各償於所  
負豈無橫及於非辜自變起不啻十年所殺傷難以數  
計觀露骸積尸之處痛長夜以何歸披黃籙白簡之文  
尚冤魂之可釋輒憑衆願虔啟真科或各誦於靈篇或  
同修於淨供哀多益寡近悅遠來仗精懇以上昭庶神  
明之可格伏願高穹下監列聖垂休照冥途而洞開洒  
法雨以沾沐九州萬里潛消鬼哭之聲六道四生永脫  
輪迴之苦

設醮青詞

乾坤大造難述恩慈草芥微生何施報謝惟忱詞之自  
竭庶陳露而必聞伏念臣身荷國恩官無吏責合家口  
衆坐竊於安榮有母年高獲供於祿養顧茲薄陋何以  
堪任况因祈禱之私數免憂虞之禍恭承慈護彌積震  
惶乃卜日於初元用歸誠於法會伏願上蒼昭格下鑒  
愚衷消无妄之災已仰資乎法力定長生之錄尚永昇  
於康寧

二

患無大於有身實賴神明之祐福莫長於無禍敢忘祭  
薦之恭仰叩洪慈具陳丹悃伏念臣稟生愚拙竊國恩  
榮身為法從而家居官無吏責而廩食歲時溫飽老幼  
康寧欽承大造之私錫此闔門之慶况乃賤息頃赴官  
期嘗暨親姻共伸齋禱既迨瀆神之譴更叨從欲之仁  
僥倖滋多凌兢罔措伏願高真降格列宿昭回赦除冒  
犯之愆臨享潔蠲之素自天獲祐息凶禍於無形與時

皆昌垂子孫而不替

三

天道玄微蓋不言而善應人心懇切斯有感而必通受  
賜實深撫躬增懼伏念臣愚不聞道老尚貪生但知竊  
祿以安居豈有微功而報國苟逃陰譴既荷神休更虞  
子婦之災曾露禱祠之懇仰叨洪造悉獲清安是用虔  
啟真科具嚴法供庶殫精恪上動監觀伏願列聖旁臨  
大慈普濟福輕乎羽敢期純錫之大來禍生有胎所冀

潛消於未兆

四

太始無形彊名曰道至誠有叩如響應聲用自竭於愚  
衷冀仰塵於聰聽伏念臣賦性頑鈍遭時盛明進不能  
陳力以事君退不能修德而善俗奉身竊祿浮食延灾  
乃從去夏以來幼穉多嬰於疾苦嘗以私情所迫懇祈  
妄瀆於明靈由是舉家悲蒙全慶上竊龐洪之施不勝  
感戴之誠爰卜元辰聿嚴淨供伏願祥光下燭惠澤旁



流特寬冒犯之誅尚鑒精虔之志旣安且吉錫難老於  
桑榆俾熾而日藹餘芳於蓬華

五

受國恩深莫伸於報效闔門口衆更迫於疾殃仰銜洪  
覆之私虔瀝謝生之悃伏念臣稟生薄陋晚歲遭逢再  
仕明時躡贊萬機之重累叨睿澤更霑三族之榮去家  
幾閱於四年攜幼殆逾於千里卒逃橫禍重反舊鄉顧  
庸繆以何堪皆聖神之密佑况緣病苦嘗賴保全茲因

冒貢於微誠併用答還於先願伏願芬芳上達靈鑒俯  
昭赦其黷犯之愆錫以安平之福宦途出處已曲荷於  
龐洪暮境身心尚永離于障難

六

物壯則老難逃病苦之憂天矜于民尚啟祈禳之路既  
叨蔭祐敢怠熏修伏念臣仕歷四朝年彌七紀自念平  
時之出處無非道力之保持福過灾生忽纏痾於下體  
月來日往幾可厭於頽齡嘗暨兒曹兩干神造剗心俟

命旋踵蒙休夫何朽邁之餘猶辱哀憐之賜爰因今日  
祇按僊科期盡展於初心更仰希於後福伏願颺游倏  
降淵鑒俯回灼知懇迫之私加惠衰疲之質盡蠲沴氣  
注金簡以增年普燭恩光均蓬門而協慶

七

年彌八秩繆先五福之稱恩自九霄敢忘一純之薦伏  
念臣受形濁世竊祿清朝退憐命數之多竒常慮色身  
之難保皇慈俯逮旣幸昇於殘骸道蔭均霑復喜登於

中壽仰被龐鴻之賜曷勝感戴之情迺卜元辰虔修淨  
供式敷謝悃希續頽齡伏願天鑒孔昭神釐來下納丹  
誠於螻蟻駐末景於桑榆欽一人而悅千萬人咸羨久  
生之樂行百里者半九十里更祈永命之休

追薦皇考黃錄青詞

禍延所怙莫報劬勞痛極終喪不勝摧割輒冒蓋高之  
聽仰陳罔極之私伏念臣夙負丕愆頃招大罰自興悲  
於陟岵嘗瀝懇以籲天未盡孝思奄及祥祭慈顏益遠

無路攀號法力可憑用嚴齋禱所冀監觀於精懇早蒙  
拔度於幽靈伏願亡考某官覺悟真心歸依大道出三  
塗之寒夜長覩光明滅四趣之苦因往生快樂

醮新宅青詞一

環堵肇新仰荷幃幙之賜蘭場夙啟虔伸豺獭之私伏  
念臣蓬葦故棲風雨莫庇勢當改造既經始於先臣責  
在肯堂用續成於治命僅違湫隘稍就規模三歲訖功  
屢躋陰陽之禁一家攸處同傾報謝之心幸元夕之甫

臨顧落成而敢後有嚴法會庶達誠忱伏願上聖垂慈  
列星回照吉祥萃止潛消妄作之凶少長咸宜永享安  
居之福

二

土木妄興深負震驚之罪雲天下覆敢稽禳謝之儀伏  
念臣聚指猥多結廬甚隘久欲命工而增築慮躋陰陽  
頃因從宦以去家遂鳩徒役鑿舊山而開址穿積壤以  
居楹規模僅足於一區功力行周於三歲每虞招譽常

再禱於神休茲幸落成用併陳於法會伏願高穹垂鑒  
列曜回光由衷俯察於信誠輕動潛消於悔吝上棟下  
宇永觀風雨之除幼子童孫咸賴旃幪之賜

母親慶壽醮青詞

五福在人咸羨久生之樂大慈立教曲施從欲之仁輒  
露忱誠仰祈靈照伏念臣身叨榮祿志在奉親堂有母  
慈年踰中壽雖左右就養每欣駒犢之從然造化密移  
已迫桑榆之景顧餘齡之難恃撫危慮而靡寧恭按真

科虔敷法席冀達由衷之款乞延難老之期仍叩眞靈  
預求恩護伏願高真下監列聖垂休憐臣愛母之私實  
由本性察臣籲天之懇非敢為身特俾親闈益增祿算  
泱餘恩於見在身外齋後果於未來世中倘獲慰於母  
心庶少安於子職

追薦皇妣黃籙青詞

禍莫大於喪親難勝追慕道常先於救物用乞號呼伏  
念臣稟生多艱無母何恃永負劬勞之德莫申孝養之



勤罪逆所招煩寃固極自營魂之初逝固齋薦之屢修  
尚慮前塵未超淨域爰當卒哭再竭哀誠回生前祈禱  
之私作身後追崇之報伏願明靈昭鑒列聖垂慈化形  
遍滿於十方開度不遺於羣品庶遷幽爽頓釋愆非徑  
上仙鄉往生快樂

禳松蟲設醮青詞

大鈞播物莫先動植之恩沴氣為灾敢廢禳禱之法蓋  
此方之衣食多仰給於山林眷言弱植之松將備異時

之用爰從近歲忽蜚蠹之潛孽乃至滿山皆蠶食而槁  
死顧殘生之已甚更遺育於方來非假威神何能撲滅  
是用恪修淨供披露忱詞仰祈佑善之衷亟下維新之  
令所冀物無疵癘氣復和平卵生化生乘靈光而滅度  
甲者折者洗法雨以蕃滋載歌行葦之仁復見牛山之  
美曲全地利盡荷天慈

禳兵災黃籙青詞

地接邊烽亟致辟兵之禱天從民欲爰推減死之恩祇

按明科式敷謝悃伏念臣微生遲暮幼累猥多昨敵騎  
之驛騷暨王師之弔伐軍聲振野暗鋒鏑於江淮殺氣  
干霄亘烟塵於里社遁逃則莫知所向憂懼而無以自  
安是用罄竭丹誠歸投金籙冀哀矜其迫切俾脫免於  
凶災逮茲經歲以平寧蓋本至仁之覆護用乘穀旦虔  
啟法筵期展盡於初心更消禳於後患伏願高穹悔禍  
厚載流謙錫景祐於皇家蕩兵氛於紫塞坐令廣宇悉  
陶至治之風下及私門長享安居之樂

追薦皇妣禮觀音疏語

威神自在發大願於慈悲功德無邊作衆生之依怙念  
我慈闈之愛遽纏陟此之哀圖報重恩惟祈善應伏願  
愚衷上格慧澤旁流十方普現方便門出沈魂於翳路  
一切同歸解脫海悟空覺於前塵

二

神通具足空覺極圖是為淨聖尊能作功德海發不思  
議大願普現十方救無量劫衆生盡脫諸苦念我先妣

已經大祥欲永離於冥途須仰憑於象教爰因禪祭載  
啟法筵伏願妙智所臨靈魂如在回心向道早覺悟於  
顛倒因緣轉身受生常逍遙於極樂世界

追薦長男禮觀音疏語

塵緣結習衆生未免於輪迴法力掃除一切同歸於解  
脫眷言亡子奄棄盛年恐罪障已積於多生致靈識或  
沈於厚夜用嚴淨供仰叩威神伏願大捨慈悲為加哀  
憫開示超升之路俾從快樂之游悟五蘊空即見非相

入三摩地遂證無生

追薦李氏水陸疏語

六趣苦因漂流不斷三乘妙力拯救無邊載稽方便

闕



華陽集卷三十



欽定四庫全書

華陽集卷三十一

宋 張綱 撰

雜文

祭張彥智文

嗚呼天生偉人堂堂傑異既博於才抑豪於氣悼往古  
之不返追流風於末裔躬信義而急人處阨窮以遊戲  
妻孥困而號啼賓客喧其沓至苦俗態之卑陬納圓鑿  
於方枘獨昂昂以在羣思雲飛而孤唳觀負抱之如此

宜少見於行事誦平生之所為亦表表於當世方建炎  
之已酉海內俶其鼎沸渡五馬於烏江守孤城之如墜  
駭盜兵以環挐顧蕞爾其何恃仗忠信而出郊逆雄師  
以單騎解血刃於垂及曾一鏃之不試倏移帥於廣陵  
膺敵氛之孔熾略旁州以煨燼眇千里而睥睨公開門  
而待之衆果却而遠避賴尊俎之折衝赫威名而逾厲  
天子異其材能詔徙近而作蔽惟建康之都會委荒城  
而晝閉招餘孽於散亡謂非公其誰治即銜命以入境

咸息黥而補劓出閭閻於瓦礫洗江山於昏翳弔野鬼  
之沈寃布春耕於新惠觀施設於三州曾未盡其一二  
俄感物以懷歸動尊鱸之逸思叩帝閭而露章拜琳宮  
之僊吏反故鄉以訪舊侶漁樵而求志方却掃以就閒  
肯輕身於權媚昔先祖之定交俾通家以相繼結盟好  
於金石沐芳馨於蘭蕙有如某之薄陋辱知過其子弟  
甫弱歲而承顏勤白首以無替每暇日之招邀吐肺肝  
而自誓走童僕之歡呼極芳鮮於庖馘傾家釀之新筍

投車轄以留醉粲一笑以相樂率百金而屢費鄙後出之纖巧獨純誠以見謂迨之官於鄱陽恻離情而分袂阻萬山而道遠馳緘滕以來許謂兵戈之未息將會面之難值徵斯言之不祥卒永隔於下地嗚呼哀哉歛不摩棺葬不臨隧邈音容而遐想撫汎瀾以出涕驚祥祭之甫臨纔一拜於墓次旅饋酒以致奠跼陳詞而略意後時而來心則有愧

祭外祖母倪氏文

恭聞令德發聞自初歸我外祖蘭芬藹如外氏族大母  
儀是勗靜專柔閒不戒而肅曷彰厥善是生叔舅起家  
白屋士林之秀帝欲用之召從百里安輿迎侍象服煒  
煒孝養方隆命也不弔訃音自南痛靡有極追念深愛  
誨言具存歲時間見視猶已孫中山遙歸一拜堂上曾  
未閱歲遽哭遺像嗚呼哀哉人亦有言五福罕備亦既  
備矣則又兼貴况復有子諸孫滿前相其令終尚何憾  
焉唯是慈訓永隔千古奠以致哀淚墮如雨

祭丁明仲文

嗚呼明仲藹茲令德何辜於天而奪之亟夫好名者爭  
尺寸之進而趨利者競錐刀之直孰如明仲有官不仕  
欣然自適日散千金了無難色此其高情逸韻視夫世  
俗之規規何啻十百而千億也方且左琴右書枕流漱  
石舒幽思而嘯詠對清樽以朝夕友先賢於三徑五柳  
之間與之合堂而共席若其考古論今旁搜遠摭或深  
入佛海或直造聖域以至醫經神巧之功地理陰陽之

蹟吳陸畫手鍾王筆蹟莫不極精而研思毫分而縷析  
嗚呼明仲旣賢而又多能胡為不壽一病至此極也雖  
然人生如夢百年瞬息達人大觀何得何失惟典型之  
徂盡後來無所矜式念此風俗使我心惻矧予葭莩之  
親契好篤於疇昔航一水以相過每論心而莫逆嗟桑  
榆之暮景期林壑以遠迹誦招隱而振衣指迷途以先  
迪將駕言而從之忽千古之永隔嗚呼哀哉日月如駛  
及此寃窅懷話言其如在邈高風以寥聞踞陳詞而奠

訣揮老淚之橫臆

祭張彥度文

同姓所先友義相勗惟公於我愛均骨月初公南來歲  
在乙酉客中見我傾蓋如舊卜居吾邑契好日親趨舍  
利害有懷必陳為飢所驅宦遊契濶繾綣不忘書無虛  
月佐幕兩州鳴琴三縣至輒有聲銛鋒稍見衆驚且喜  
抱能將施公曰休矣善刀藏之奉祠歸來我方屏處白  
首對談過相勞苦曰惟此身來日無多一笑相樂吾其



敢疎別去未幾話言猶在命也不淑忽焉棄背嗚呼哀哉公兄寶文我之先友國士期我親愛篤厚斯人旣沒典型在公不慙遺一吾誰與從豈無交游莫如公久四十五年夢覺何有聊陳薄奠送公西山追懷曩昔淚下重泉

祭胡氏碩人文

人之家法實由中饋允矣今德流芳必異仰惟碩人生有殊質歸我舅氏見謂良匹承上撫下以身周旋達於

宗黨靡有間言婦順母儀既克兼備凡厥家事不嚴而  
治舅方從宦進蒙上知曰惟在公遑恤我私匪其弗恤  
閭職有付處不失宜吾復何預暨登法從內助益勤湯  
沐疏封絲綸載新一時光寵有暉其盛豈無所本惟德  
之令謂宜百年永膺福祉胡為一病遽至不起嗚呼哀  
哉昔我外祖有子三人伯仲蚤世叔也獨存天既相之  
俾克顯大曷又抑之而奪其配我為其甥劬勞念母時  
過外家庶慰孤苦骨肉同體舅惟我親碩人遇我親愛

惟均親之愛之義則有勗如已子弟思久彌篤去冬之  
別言猶在耳方卜再見遂隔生死訃音初聞哀極號慟  
何哀之極母黨為重瞻彼下泉歸窆有期永懷懿範胡  
寧忍違恭陳薄奠侑以楚些情見乎辭聲淚俱墮

祭陳美成文

粵惟陳氏世有令德如公父祖我幸及識先德往矣典  
型在公方嚴厚重有祖遺風尚其家學博文約禮篤志  
不倦惟公是似再世濟美亦旣兼之以戒以守厥譽四

馳譽之云何曰誠長者修身齊家飾以儒雅顧我衰遲  
里閭相屬佩服典常蘭芬蕙馥乃以女孫為其子婦冀  
聯姻好相親以久孰云一病遂至此極堂堂若人何去  
之亟逾五望六壽則不充族半青紫時獨不逢皇天畀  
付不充有命有德有義不逢何病餘慶流行在其後昆  
身雖永已不亡者存詞以寫哀一別千古尚想平生淚  
墮如雨

祭甥丁伯升文

嗚呼吾甥氣貌堂堂何賦分之多蹇而受命之不長未  
孩而孤既孤而病或者以為不祥惟吾令妹獨有是子  
不幸而又嫠居曰吾尚何為乃切自慕於其姜我先大  
人與先夫人日夜念之欲奪其志以嫁而妹以甥之故  
指天自誓凜然有甚於秋霜觀夫守義若是則其所託  
於襁褓者厚矣譬猶草木之芳固將封之植之擢危根  
而孤秀期拱把於千章以吾甥出於積德之後且夙承  
其母訓又有伯父叔父教以義方吾故謂甥異日必能

自立而寵其餘慶浩乎其未可量也豈知事有大謬年未弱冠而天奪其母零丁一身蓋僅存而若亡有婦甚賢亦相繼而下世痛猶未已又哭其長子之喪夫憂患百罹至此極矣嘗試推否泰之消長尚庶幾其享後福而壽康奚慘罰之太甚嬰此微恙而禍變卒駭於非常嗚呼哀哉甥舅恩義如何可忘獨捨我以先去其孰知余心之惶惶而况平生志願命有所制百不一償我是用追悼反復為出涕而淋浪雖然有形同歸於幻滅一

死何足以悲傷顧或修而或短等炊夢於黃梁聊攄詞  
以寓意薦餘哀於一觴千古永訣歸安於藏

祭舅李侍郎文

惟公與我親則為舅道義之交實同朋友或出或處一  
話一言未嘗不竭誠盡心以相佐佑如何天奪之亟一  
病遂至於不救嗚呼哀哉公生我後十有三年我之知  
公益自其幼有若梗楠豫章擢於喬林雖拱把之微已  
見其蔚然而孤秀及其長也讀書考古夜以繼晷書議論

英發智略輻輳則又若騏驥驎騮一日千里駸駸乎得  
夷途而馳驟故嘗自謂材高者必能高舉器大者斯可  
大受於是發策決科蜚英騰茂當聖主收人材致太平  
之時能自拔於流輩躡羣英而並筵內而法從之嚴外  
而大郡之守獨以望實得之易若取諸懷袖且天之生  
公既畀以能名又寵以祿厚是將全其所享而終以期  
頤之壽不謂令德壯猷方植而仆痛功名之雅志曾萬  
分之未就嗚呼哀哉公之材氣剛明諒直蓋天性之自



然無所矯揉以是而游於世故能任誠無欺徇義不苟  
雖遇事繁劇而蟠根錯節交手前必使之毫分縷析情  
窮理究如庖丁之解牛迎刃若然顧何勞於擊剖此固  
公之所長而人亦以是稱公同一辭於萬口初公罷官  
而歸以病來告亟往見之猶能為我強起握手道舊頗  
怪其二年之別白髮蒼顏氣清容縵方咨嗟而歎惜公  
忽笑曰子言何陋人生固有一死孰先孰後譬猶客寓  
時至則行何畏之有以是見公冒中所存死不足以動

之而況世間得失利害其又奚疲追懷曩昔每聞擊節  
慷慨之談必有以發吾覆今我老矣事乃大繆生存之  
念既絕同心之盟莫副命也不淑安所歸咎情愴恍而  
愁思淚淋浪而噎嘔聊陳薄奠詞以為侑諒靈魂之未  
遠冀萬一於三嗅

祭叔排岸文

昔我先君唯叔同氣兄弟恭華鄂韡韡於時燕私某  
每侍旁一話一言敬佩典常先君既沒嗟我何怙儀刑

所瞻獨有叔父恩義再勗慰此孝思如何不弔叔又棄  
遺嗚呼哀哉堂堂吾叔得官歲晚材不及施有言莫踐  
浮沈里社夏屋渠渠既富且樂宦達誰如謂宜百年享  
有全福七十非夭唯曰不足人曰不足叔也何憾有子  
若孫卜安於坎如某蹇薄老去疇依杖屨未遠舉目烟  
霏陳詞奠訣以寫哀慕詞奠究哀淚墮如雨

祭弟彥節文

昔我先祖頽然五孫皆以世業種學績文季孟之間君

勇且仁屢戰詞場誓將策勲事既大謬棄如飛雲浮沈  
里閭坐閱紛紜被褐懷玉匪琢而珍昂昂令姿野鶴鷄  
羣氣有拂膺怒髮衝中心豈芥蒂即之也溫是謂坦率  
一笑一嘖曾莫矯揉任吾天真自其少小我固知君允  
矣直諒古之德人宜壽百歲率俾風淳云何不淑奄忽  
沈淪嗟我老矣來歸鄉粉交流零落其誰與親賴有諸  
弟異戶同門花月風烟欣然一尊情久彌篤謂當終身  
君遽舍我悲哉良辰壽雖未極甲子越旬生雖不達子

孫訖訖數則有盡不忘者存亦可無憾安於丘墳唯是  
老懷痛茲天倫想念疇昔悽愴蒿煮酒饋如生冀來清  
魂嗚呼彥飾聞乎不聞

祭弟彥深文

嗟余生之多艱舉一世而少徒矧投老於窮巷交游散  
而益踈獨三弟之鄰牆分戚休而與俱每論心而莫逆  
撫芳辰以自娛粵己卯之徂夏鴈序折而稍孤念過從  
之鮮歡猶二季之相扶曷沈痛之未定君又棄余於半

途愴餘年之無依籲蒼天其何辜嗚呼哀哉才疎而通  
莫之或攄心和而平退然守愚不知者謂君藏蓄之深  
而獨善知之者未嘗不歎其優游卒歲得保身之令圖  
頃一病之沈綿氣脫消而莫甦冀藥石之可恃竟奄忽  
而云徂紛華萼之凋悴復誰憐於朽株老懷悽其感傷  
泣涕淚而盈裾設豆觴之菲奠視生平而不殊幸清魂  
之一歆歸即安於山隅

祭談彥才文

嗟我有生逾八十年親戚故舊壯歲滿前水逝舟移去  
者紛然獨吾彥才相視華顛暇時過從一尊留連話舊  
論心情久益堅曷又厭余棄之而先念茲惇惇有懷孰  
宣嗚呼彥才和易周旋喜愠如一舉鄉推賢平生康強  
五福幾全晚見其子服榮官聯天報善人可無憾焉唯  
後死者無徒自憐去年之冬微疾已纏扶杖過我諄諄  
話言猶冀後會約期禁烟豈謂永訣遽營新阡我老艱  
出空望堂筵一奠寓哀淚下迸泉

謁文宣王廟文

某去聖已遠學道不工叨恩竊祿領茲獄事大懼不能  
任職然嘗聞諸夫子聽訟猶人必使無訟某雖不敏請  
事斯語尚其降鑒有以相之

謁諸廟文

某叨被誤恩當一路按舉之職自視薄陋疇克以濟惟  
神宅靈此邦功德顯茂尚其陰相庶免大戾即事之三  
日敢用虔告





華陽集卷三十一

欽定四庫全書

華陽集卷三十二

宋 張綱 撰

雜文

祭皇考文

父兮生我恩同於天孝養永違攀號不逮日月如駛奄  
經寒食顧瞻墳土宿草方春追慕慈顏獨閉幽壤匍匐  
叩地肝心潰裂念此孤藐無父何怙天命不弔敢誰怨  
尤嗚呼哀哉酒榖芳馨恭致薄奠旨甘之奉不異平生

庶格靈魂鑒此哀懇

祭皇妣文

某積惡深重禍延先妣喪期迅速既就外除痛念劬勞  
大恩莫報號天扣地無所逮及嗚呼哀哉蓋聞死者謂  
葬為藏故體魄降地乃始有歸不肖之孤是用不敢忘  
窀穸之事謹卜七月六日敬奉靈輶祔於先君中大夫  
之墓恭惟先妣三年在殯音容寔遠猶有几筵得以朝  
夕號慟慰孝思萬一今也歸窆泉壤永隔慈顏雖欲升

堂摩棺想像如在殯時豈復可得唯有生存拊育慈愛  
追慕感咽無不有窮盡嗚呼哀哉嗚呼痛哉母子之愛  
如何相舍禮當即遠忍痛奠訣

焚黃文一

圓丘祭天禮成肆赦是為國家大典歲在戊申肇舉於  
維揚迄今十五年矣天子聖明干戈載戢海內綏靖乃  
復舉舊章以幸天下凡厥有官自通籍而上恩皆及親  
德至厚也我先考昨已累封官至中散今茲被命加贈

一等進為中奉大夫嗚呼自葉流根天澤也根不植者  
葉不茂惟昔中奉植德自晦陰貽後人是使不肖之孤  
襲其餘芳竊有祿位叨榮以責先隴謹擇令辰跪奉綸  
綍告於尊靈尚想平生膺受光寵惟是慈訓永隔不勝  
感涕哽噎之至

二

嗚呼父母大恩天地罔極如何可報獨有朝廷命數靈  
被幽壤庶以慰孝思萬分乃去年冬天子親郊謁款紫

壇禮成肆赦凡厥在位自通籍以上均釐錫福咸得顯  
榮其親故先考昨累贈中大夫今加贈太中大夫先妣  
已封太令人今隨先考秩位加贈太碩人蓋寄祿之官  
遷至太中大夫則秩比法從非示優寵不輕畀付而命  
婦之碩人非其夫若子宮與太中比亦不以封嗚呼漏  
泉之澤自葉流根吾君待遇臣下可謂厚矣某竊伏自  
念坐尸榮祿無尺寸之功而蒙上恩渥如此豈某不肖  
所能自致哉寔是我考妣積德獲此異數某老矣不復能

報國恩但當以疇昔教忠之言貽厥子孫庶或克承以  
慰地下之望躬陳薄奠展墓焚黃想像生存哀榮感切

冬至祭長男文一

陽來為復君子道長誰不逢時舉家相慶我獨何辜懼  
此凶禍上堂奠哭既失慈顏回視兒曹又不見汝惟汝  
婦子伏拜我後纍纍衰絰舉目傷之我哭我母心折欲  
死而汝諸孤哭汝不已我今垂老衰病日迫俯仰若是  
胡寧久生聊因令節酒餽致奠來止歆茲慰我悽惻



二

惟人之情莫親於父子雖壽夭之既定有生而必死吾固知之而猶於汝感咽痛悼懷之不置得非情之所鍾觸緒感發有不能自己者耶嗚呼去年寒食汝初病時謁醫三茅十日而歸今復見此令節汝獨冥漠去無歸期餘三尺之孤墳委宿草之紛披悽然念想涕泗交頤觴酒豆肉令豎攜以奠汝靈魂未泯知乎不知

祭李氏孺人文

嗟人生之必死兮如夜旦之有常惟體魂之降地兮故  
謂葬以為藏哀夫君之下世兮當暮秋之肅霜敵騎紛  
其南驚兮盜賊乘時而陸梁遍雲擾於江淮兮孰不憂  
心而惶惶徙君柩以旅殯兮計實出於倉忙經嚴冬之  
冰雪兮倏又見夫春陽委靈骨於草莽兮空丹青之在  
床每一念而興哀兮未嘗不揮涕淚而淋浪也嗚呼哀  
哉卜觀墓之高原兮山深而水長卜二月之壬午兮日  
吉而辰良舉窆窆之大事兮冀清魂之樂康歎吾年之

垂盡兮置壽藏於汝旁將百歲以同歸兮胡能獨處而  
悲傷就新塋而結屋兮陳薄奠之潔芳考古誼以即遠  
兮不復祖載於中堂追懿德而莫返兮斷九回之危腸  
諒精誠之未泯兮酬永訣之一觴安萬古之幽宅兮期  
終焉而允藏

祭孫女文

爾之生也稟姿聰慧居室則為淑女既歸則為賢婦言  
德功容無一不備吾閱人多矣如爾之婉嫕夙成者蓋

亦鮮儷柰何天不與齡春花始榮遽歎凋瘁嗚呼爾之歸寧也欣欣送迎本期抱子而還侍豈謂禍生不測呼吸之間遂至永棄念十有九年之所為覺成毀之須臾殆如夢而如寄人誰不死惟爾之死年不及壯病不及藥繼嗣未立魂單骨寒所以使吾舉室寃痛號泣而不能已也惟家廟無祔姑之文而婦人有從夫之義是用舉爾靈櫬以翌日吉辰登舟復歸於江陰之曹氏至若葬祭之厚薄時日之遠近則一在爾之夫而吾不當復

經意也去年四月結禱出門今年四月棺與川逝人非  
木石之無情行路亦為之流涕觴酒豆肉聊作終天之  
訣雖陳詞千萬不能寫吾悲哀之至切也

李公朝奉墓誌銘

故右朝奉郎李公諱華字君儀今左朝奉大夫知平江  
軍府事朝正之父也其先出隴西世遠而分有居建康  
之句容者不知其所以徙偽唐兵亂又避於溧陽遠郊  
因家焉故公為溧陽人曾祖曰瓌祖曰俊父曰憲三世

建公皆晦迹不仕公享年八十有六建炎三年六月乙亥以疾卒於家十月壬寅葬家之西五里曰下湯之原其後平江歷仕以恩累贈公至今官乃移書其甥張某曰先人潛德隱行宜有辭於後世而葬迫兵火不暇乞銘於今二十四年矣子其念之公於某為外祖知其平生顧莫詳於某者且舅命也何敢辭惟公純直簡諒貌莊而溫方其少時於流輩中已見推重父沒居喪毀瘠盡哀母老得疾廢於牀公垂泣憂懼遂置家事不問而

專意奉養抱持卧起進粥藥以至盥帨織悉必躬必親  
故其身不出戶庭而衣未嘗解帶如是者十餘年莫知  
晝夜寒暑人以為難尤篤於友愛同氣五人從容季孟  
間上承下順相親以睦內外無間言平居安閒喜怒不  
形於色而家法益整與人交恭順而有禮自敵以下至  
於庸人孺子接之必盡其意初不以長老自處人有過  
惡絕口不道為覆護之唯恐勿及有田十餘頃歲水旱  
誓不一言減縣官租自其先世已然而公守之尤謹穀

翔貴亟發廩平價以食其一方虛甑待炊者以千計大  
觀政和間蝗數害稼羣飛下其田輒去不食田鄰愧駭  
且以相告公曰偶然爾勿復言蓋其謙抑不欲近名類  
如此嗚呼人之行莫大於孝友而心之所存推以接物  
莫先於忠厚是二者衆可能也惟公得於性之自然而  
行之終身不變乃與衆異故以是修于家交于人而信  
於鄉里當是時雖三尺之童聞公之名莫不率教而自  
勉有若桀黠無賴亦知畏公之義不敢犯分以為非夫



以流俗之難化而公能使之愛慕說服如是其所謂一鄉之善不言而信者歟公先娶周氏再娶倪氏皆贈令人子男三人長曰蘊前公卒次曰茂亦卒於公葬之明年其季即平江也女一人適張氏是為某母贈碩人孫女十六人曾孫男女二十七人初公倦於家一日宴坐召三子誨之曰蘊與茂汝治生有法宜勉力以輔吾老曰朝正汝篤志于學可出從士大夫遊立身揚名以大吾門由是二子力生業不去左右而平江辭入太學不

數年登顯科釋褐而歸人皆以為公榮而公亦自喜有  
子以適其志也雖然公之所積者厚天將報之其後必大  
以顯而傳永久豈止榮一時而已哉今平江以材見用于朝  
歷禁從典輔藩赫然為時聞人則既大且顯矣公雖不及  
見而漏泉之澤自葉流根亦足慰地下之望以是知李  
氏之興公實積之而平江發之繼自今勿替於前則餘波  
寔廣浩乎其未可量也某既得論次公之羣行至于為  
善獲報可垂訓於後人者尤不敢略則又為之銘銘曰

建康古邑惟瀨之陽李氏世家自公而昌厥昌伊何  
種德惟茂惟孝惟友濟以忠厚一鄉稱善公不自伐  
人各有知心服以悅謂此耆老性合天道監觀在上  
其必有報天既報公享有全福又錫之子大發其蓄  
發不自躬匪時不逢以積慶基垂耀無窮下湯之原  
山高水遠碣此銘詩式勸為善

金壇縣放生池記

紹興十三年夏五月有以唐放生池言於朝者皇帝若

曰嘻此仁政也有唐規制狹陋流澤不廣宜有以侈大之即日有詔下其事諸路行焉鎮江三邑金壇地最居下號為澤國其民習網罟而嗜殺越五年左宣教郎趙公稱來宰是邑入境問俗愀然勿怡亟取詔伏讀曰皇帝盛德好生而吏媮勿虔物未蒙惠今不勉其何以逃罪乃相縣治東南不能一里得窪田焉近市無喧在野不僻溪湖流派以回繞島嶼分峙以相屬遂命度以為池視田之直幾何而償不損其價計工之費若干而役

不奪其力以十月旣望庀徒經始決沮洳縱鋪而濬之  
為深十尺縱廣百步有竒繚曲堤而面方植嘉木以環  
蔭凡役三十有五日而池成清曠浚潔寒波激隄野色  
交映外與天際渺然有江湖千里之思於是作亭其北  
憑高而下臨焉旣又設關鑰嚴厲禁使往來者有時而  
漁盜毋得入明年天申令節宰乃躬率其佐若邑之士  
大夫會於池再拜呼舞大贖生縱之百族鉅細脫鼎鑊  
自適蓋不可為量數邦人聚觀無不以為歡樂而致華

封人所以祝堯之意且曰吾君之德及於物也深矣昔  
文王有靈德以及物而民樂之請以君德名其亭使吾  
邦人歲歲來會臨斯池也登斯亭也以樂吾君之德不  
亦可乎宰曰謹奉教遂狀其事以來屬為之記臣叨被  
恩寵念無尺寸功以報今幸目覩盛事願有紀述以歸  
美萬分固不當以文字曖昧不稱為解蓋聞天地之大  
德曰生聖人誠參天地贊其化育不忍一物不遂其生  
者仁之至也夫羽毛鱗介物之甚微而人所不加恤以

一人之尊有天下之富而於甚微人不加恤之物惕焉  
思有以生之則其至誠惻怛所以加惠元元者可不論  
而知矣是以善言治者必以鳥獸魚鼈草木昆蟲咸若  
其性為治之極考觀唐虞三代之隆其功效靡不在茲  
而尤備見於成周之世騶虞靈臺行葦皆其詩也天下  
誦而歌舞之至今不息何其盛哉我國家以仁德受命  
聖聖相繼惠綏萬方皇帝陛下躬神武不殺之姿光紹  
前烈戢兵慎罰視民如傷海內安安無一夫不獲而宸

衷惻隱猶恐渥澤未孚戕敗天物故斯池之作創新增  
舊徧於郡邑要使有生有形皆一陶粹飲和不復罹暴  
殘之苦信乎至德流洽下澈淵泉矣將見天地之間潤  
澤豐美庶類至於蕃殖風俗化為忠厚論功較德比隆  
成周區區有唐誠不足道嗚呼非天下之至仁其孰能致  
此孔子曰仁者壽又曰大德必得其壽大哉仁之為德  
也以所施乎一邑者觀諸郡以所施乎一郡者觀諸天  
下在在處處恩被動植生之育之而其所施也無窮其



施無窮則天之報之也豈有窮哉是以既醉者太平之詩也君子萬年天實錫之假樂者嘉成王之詩也子孫千億天實申之臣不佞敢拜手稽首以是二詩請祝聖人此非獨臣之志也亦邦人之願也


### 安樂國序

余自少多病藥裹關心人有善方輒就抄錄久之集其所得疏為二十八條名之曰安樂國閉門無事卧游國中閱蟲鳥草木之變擢其可用俾各効靈庶幾身獲安

樂非敢以醫為事也而丁氏甥伯升性頗似舅亦復好蓄醫方從予求得其本喜津津見顏間若將用是救人疾苦者余謂甥之用心則善矣然此不可易也用藥當如用兵藥有方猶兵之有書孫吳之書行於天下舊矣兵家者流舍此無以勝敵而霍去病乃謂顧方略何如不至學古兵法得無以權術之妙有非書之所能盡者要在變而通之自得於言意之表則戰勝攻取暗合孫吳蓋如是然後為名將嘗試考觀醫方種種之病無所

不療然病有百變而變不同藥有同功而用各異精微  
之旨方豈能述斟酌損益存乎其人而後生晚學僅能  
窺其藩籬便謂世間之病吾已盡得按方投劑可使立  
愈意直徼倖於一中曾不知毫釐之失為害滋大可勝  
惜哉古人有言知兵之將人之司命今余所集二十八  
條皆安樂國中兵也尺籍伍符指呼在我苟得其要則  
麾左而左麾右而右可以出奇應變策勲於五苦六辛  
之間如其不然暗中殺人雖不以挺與刃相去幾何鳴

呼此真不可易也慎之哉



華陽集卷三十二